

## **Yohanis naree kedan lia saa mak atu dadi baa oras Rai Falu Fila**

<sup>1-2</sup> Tabe nosi ha'u, Yohanis, mak Yesus Kristus ain-liman.

Iha ne'e ha'u kakerek kosi lia saa mak nosi ikus atu dadi. Ha'u kbele simu lia ne'e sia, nune'e: Na'i Maromak du'uk mak natudu kedan baa Yesus Kristus nebee nato'o baa Niakaan ema sia. Hotu, Yesus naruka makbukar lale'an ida, baa nalore lia ne'e sia hotu-hotu baa ha'u, nebee kakerek kola kedan. La kleur ona, lia ne'e sia hotu-hotu nanis dadi. Tan baa nia, hanono di'a-di'ak Na'i Maromak Manfatin ne'e mak Yesus solok.

<sup>3</sup> Na'i Maromak nameno ti'an na'ak, Nia atu natuun matak-malirin baa ema hotu-hotu mak leno no nanono hakerek ne'e nodi nala'ok Niakaan Manfatin. Tan niakaan oras atu hotu ona.

*Yohanis nato'o Na'i Maromak Manfatin baa ema sarani klubun hitu iha rai Asia*

<sup>4</sup> Ha'u ksolok hakerek ne'e baa Yesus Niakaan ema klubun hitu iha rai Asia.

Ha'u kusu moris manek no dame kosi Na'i Maromak bodik emi hotu-hotu. Nia iha kedan ti'an hori uluk. Nia iha baa oras ne'e. Nia moos iha to'o nima-nimak. Ha'u moos kusu moris manek no dame kosi Maromak Kmalara

Lulik. Ha'u ktitu-karee Kmalar Lulik nia, hanesan kmalar hitu mak se'i oin baa Na'i Maromak habesi aan fatin.\* ☆

<sup>5</sup> Ha'u moos kusu moris manek no dame kosi Yesus Kristus. Nia katak malorek lia hotu-hotu mak Na'i Maromak katak ti'an baa Nia. Uluk, Nia mate, mais Na'i Maromak nalo Nia moris nikar, nebee dadi ema dala uluk mak moris nikar nosi mate. Nosi ikus, Nia moos atu dadi Na'in baa na'in hotu-hotu iha raiklaran.

Yesus raan nakduar to'o mate, tan Nia nadomi ita. Nodi mate, Nia loke dalan atu sori ita nosi itakaan salan.☆

<sup>6</sup> Hotu, Nia foti ita baa Niakaan renu, nebee ita serwisu bodik Niakaan Ama Maromak. Yesus Kristus maka'as nanis! Niakaan beran la nakotu! Ne'e, tebes!☆

<sup>7</sup> Dadi, loke matan, mana di'a-di'ak! Oras ne'e, Yesus no Aman iha lale'an baa. Mais la kleur ona, Nia atu namaan aan tuun mai nosi lale'an nodi kalo'an. Baa oras nia, ema hotu-hotu iha raiklaran titu-naree Nia. Nunia moos, ema mak uluk sona no'o Nia. Baa oras titu-naree Nia, ema klubun hotu-hotu iha raiklaran moos, sadi'a nodi tanis naro'an aan. Lia nia sia hotu-hotu, nanis dadi. Ne'e, tebes!☆

<sup>8</sup> Na'i Maromak dale na'ak,  
"Ha'u ne'e,  
Alfa to'o Omega.

Ne'e na'ak,

---

\* **1:4** Tuir ema matenek lia Hakerek Moon, ema filak nomer hitu ne'e, nomer lulik. ☆ **1:4** Ema Isra'el Sai Nosi Mesir 3:14; Lia Raiklaran Falu Fila 4:5 ☆ **1:5** Yesaya 55:4; Kananuk Sia 89:27 ☆ **1:6** Ema Isra'el Sai Nosi Mesir 19:6; Lia Raiklaran Falu Fila 5:10 ☆ **1:7** Daniel 7:13; Mateus 24:30; Markus 13:26; Lukas 21:27; 1 Tesalonika 4:17; Sakarias 12:10; Yohanis 19:34,37

Ulun to'o Ikun.  
 Hotu-hotu huun baa Ha'u,  
   nosi huun to'o rohan.  
 Ha'u, mak iha kedan ti'an hori uluk.  
   Ha'u, mak iha baa oras ne'e.  
 Ha'u moos, mak atu iha to'o nima-nimak.  
   Tan Ha'u kmesan dei, mak beran kaliuk!\*"

*Yohanis titu-naree Ema Raiklaran Isin iha lale'an*

<sup>9</sup> Tan ita fiar bele-bele ha'ak, Yesus, itakaan Na'in, etuk ha'u kdadi emikaan maluk. Ema balu krakat tan ita tuir Yesus, mais Yesus nakbiit itakaan neon, to'o ita bele haterus aan bei-beik. Sia moos krakat ha'u, tan ha'u katak Na'i Maromak Manfatin baa ema, kodi kanorin lia Yesus. Tan lia nia, sia kohi nodi soe ha'u ti'an baa rai ne'e, mak naran Patmoos.

<sup>10</sup> Hotu, baa leron hamulak ida, Maromak Kmalar Lulik kona ha'u. Teki-tekis, ha'u krona lia maliak maka'as ida, nu'u kfui dikur lian nalian nosi kotuk.

<sup>11</sup> Lia maliak nia naruka na'ak, "Yohanis! Ha'u kakara kalore lia ida baa o. O musti makerek mola hotu-hotu lia mak o maree ne'e. Hotu, o musti solok baa ema sarani klubun hitu, mak ida-idak iha kota Efesus, kota Smirna, kota Pergamus, kota Tiatira, kota Sardis, kota Filadelfia no kota Laodikia."

<sup>12</sup> Rona kola nunia, ha'u kfila baa kotuk atu karee ema mak dale nia. Mais, karee loos badut lolon hitu iha badut sasukun mak halo hosi mean.

<sup>13</sup> Noo ema ida mak nariik iha badut nia sia klaran. Ilas hanesan Ema Raiklaran Isin. Tau

\* **1:8** Lia Raiklaran Falu Fila 22:13; Ema Isra'el Sai Nosi Mesir 3:14

faru klobor ida, nodi sakat tais mean ida baa karas.✧

<sup>14</sup> Fuuk, mutik hanesan kabas rahun.† Matan, laka hanesan ha'i lakan.✧

<sup>15</sup> Ain, mean laak hanesan besi riti hamotu. Lian maliak boot, hanesan wee tatolik.✧

<sup>16</sup> Liman kwana kaer fitun matan hitu. Surik matan ruak ro'at ida naklosu sai nosi ibun. Oin, naksinak kroman hanesan loro sinak.

<sup>17</sup> Titu-karee ema nia, ha'u kakloti kedan iha ain. Mais Nia kebit ha'u nodi liman kwana, hotu dale na'ak, "Oa! Keta mata'uk! Lia hotu-hotu huun nosi Ha'u, hori uluk fohon to'o mohu.✧

<sup>18</sup> Uluk, Ha'u kmate. Mais maree mai! Oras ne'e, Ha'u kmoris kikar ti'an. Ha'u moos atu kmoris to'o nima-nimak. Ha'u, makaer sabi matebian fatin. Ha'u mak karuka taka-loke fatin nia, tan Ha'u koo beran kalo ema moris nikar.

<sup>19</sup> Dadi, o musti makerek mola lia hotu-hotu mak o maree baa oras ne'e, no lia hotu-hotu mak nosi ikus atu dadi.

<sup>20</sup> Ha'u kalore uluk lia isin nune'e: Badut mean hitu nia na'ak, ema sarani klubun hitu. Fitun matan hitu nia mak o maree iha Ha'ukaan liman kwana nia na'ak, makbukar na'in hitu mak nodi lia nosi Na'i Maromak baa ema sarani klubun hitu nia."

## 2

---

✧ **1:13** Daniel 7:13, 10:5 † **1:14** Hakerek Moon lia Yunani na'ak, Niakaan ulun no Niakaan fuuk mutin hanesan bibi malae rahun mutik no mutin hanesan ma'un fatuk mutik. Lia rua-rua ne'e na'ak, mutin tebe-tebes hanesan kabas rahun. ✧ **1:14** Daniel 7:9 ✧ **1:15** Daniel 10:6; Yeskiel 1:24, 43:2 ✧ **1:17** Yesaya 44:6, 48:12; Lia Raiklaran Falu Fila 2:8, 22:13

*Yesus solok hakerek baa ema sarani sia iha kota Efesus*

<sup>1</sup> Hotu, Ema Raiklaran Isin nia naruka ha'u na'ak, "Yohanis. O musti makerek mola hakerek ida. Hakerek nia lian nune'e:

'Bodik ema sarani sia iha kota Efesus:

Hakerek ne'e, nosi Ha'u, mak Yesus. Ha'u mak kaer fitun matan hitu iha liman kwana. Ha'u moos la'o kasirin atu karee badut mean hitu nia ida-idak. Hanono ha'u kdale ne'e.

<sup>2</sup> Karee ti'an emikaan moris iha kota Efesus. Emi haterus aan hodi serwisu susi ruin bodik Na'i Maromak. Oras ema aat mai iha emikaan klaran, emi dudu sai. Oras ema mai naktolek na'ak, nia mak Ha'ukaan klosan, emi leno di'a-di'ak niakaan moris, to'o hatene hola niakaan tolek teen. Hotu, emi dudu sai, la hanono nia.

<sup>3</sup> Masik ema nasusar emi tan fiar Ha'u, emi haterus aan, la hakiduk kois.

<sup>4</sup> Mais, emi monu ti'an iha lia ida. Uluk, oras emi foin fiar Ha'u, emi hadomi malu. Mais oras ne'e, la nunia ti'an.

<sup>5</sup> Tan baa nia, emi musti hanoin oras uluk nia hodi hanawa ona hosi sala nia, nebee hadomi malu hikar hanesan uluk. Kalo lale, atu kmai kola kikar badut mean nia nosi emi.

<sup>6</sup> Masik nunia, Ha'ukaan neon sei di'ak netik, tan emi la simu hanorin tolek nosi Nikolai eman sia. Ha'u moos la simu hanorin nia.\*

<sup>7</sup> Hanono di'a-di'ak lia mak Maromak Kmalar Lulik katak baa ema sarani sia. Ema mak tuir Ha'u to'o mate, Ha'u kfoo leet baa nia

---

\* **2:6** Ema matenek lia Hakerek Moon sia na'ak, Nikolai niakaan hanorin sia, ita la hatene.

atu naa nosi ai huun iha Na'i Maromak to'os etu. Tan ema mak naa ai huun nia fuan, netan moris namutuk no Na'i Maromak to'o nima-nimak.'''<sup>✠</sup>

*Yesus solok hakerek baa ema sarani sia iha kota Smirna*

<sup>8</sup> Hotu, Ema Raiklaran Isin nia dale natutan na'ak, "Yohanis, dala ida ne'e o musti makerek tenik hakerek ida. Hakerek nia lian nune'e:

'Bodik ema sarani sia iha kota Smirna:

Hakerek ne'e nosi Ha'u, mak Yesus. Lia hotu-hotu huun nosi Ha'u, hori uluk fohon to'o mohu. Uluk, Ha'u kmate, mais oras ne'e, Ha'u kmoris kikar ti'an. Hanono Ha'u kdale ne'e.<sup>✠</sup>

<sup>9</sup> Karee ti'an emikaan moris susar iha Smirna. Emi ne'e, mukit iha ema raiklaran oin, mais, soi iha Na'i Maromak oin. Noo ema mak dale na'ak, sia, Na'i Maromak eman. Mais, sia moos nadois emikaan naran. Tuir loos, sia lahoos Na'i Maromak eman. Sia tuir diabu ulun dei.

<sup>10</sup> Dadi, hanono di'a-di'ak. Lalika hata'uk hetan susar. Surak hatene, diabu ulun buka atu natama emi balu baa bui to'o loron sanulu laran, tan nia nakara nebee emi se'i kotuk baa Ha'u. Masik emi kona ho'o, keta halu'a Ha'u. Tan ema mak tuir Ha'u to'o mate, atu kselu kikar nia kodi moris nima-nimak.

<sup>11</sup> Hanono di'a-di'ak lia mak Maromak Kmalar Lulik katak baa ema sarani sia. Tan ema mak tuir Ha'u to'o mate, nia la

---

<sup>✠</sup> **2:7** Lia Uluk Fohon 2:9; Lia Raiklaran Falu Fila 22:2; Yeskiel 28:13, 31:8    <sup>✠</sup> **2:8** Yesaya 44:6, 48:12; Lia Raiklaran Falu Fila 1:17, 22:13

terus susar iha tasi ha'i mak laka nohuun.  
Hodi nunia, nia la mate dala rua.'''☆

*Yesus solok hakerek baa ema sarani sia iha kota Pergamus*

<sup>12</sup> Hotu, Ema Raiklaran Isin nia dale natutan tenik na'ak, "Yohanis, dala ida ne'e o musti makerek tenik hakerek ida. Hakerek nia lian nune'e:

'Bodik ema sarani sia iha kota Pergamus:

Hakerek ne'e nosi Ha'u, mak Yesus. Ha'u mak kaer surik ro'at matan ruak. Hanono Ha'u kdale ne'e.

<sup>13</sup> Katene ti'an emikaan kota Pergamus nia. Makaer ukun iha nia, diabu ulun. Masik nunia moos, emi kaer metin Ha'ukaan naran, hodi fiar Ha'u bei-beik. Uluk, Ha'ukaan ema ida iha nia, naran Antipas. Nia nanorin nalo loos nosi Ha'ukaan dalan moris, mais ema no'o nia. Masik nunia moos, emi la heli Ha'u.

<sup>14</sup> Mais, emi monu baa lia ida-rua, tan emi na'in hira tuir Balam hanorin kale'uk. Uluk, Balam nanorin Balak atu sokur ema Isra'el sia, nebee nakur Na'i Maromak beer, to'o sia naa hahaak mak sera baa ai'oi lulik no nakur biti-kluni.☆

<sup>15</sup> Emi na'in hira moos tuir Nikolai hanorin.

<sup>16</sup> Dadi, emi musti hanawa hosi emikaan salan nia sia. Kalo lale, la kleur Ha'u kmai karoe emi kodi Ha'ukaan lia fuan mak ro'at hanesan surik.

<sup>17</sup> Hanono di'a-di'ak lia mak Maromak Kmalar Lulik katak baa ema sarani sia. Ema mak tuir Ha'u to'o mate, Ha'u kfoo leet baa

---

☆ **2:11** Lia Raiklaran Falu Fila 20:14, 21:8 ☆ **2:14** Sura Renu Isra'el 22:5, 7, 25:1-3, 31:16; Hanoin Hikar Dalan Moris 23:4

nia atu naa tubi *manna* mak rai kedan ti'an nosi lale'an. Ha'u moos atu foo fatuk mutin ida mak noo hakerek niakaan naran foun. Nia mesan mak natene naran nia. Ema seluk la natene.'"<sup>☆</sup>

*Yesus solok hakerek baa ema sarani sia iha kota Tiatira*

<sup>18</sup> Hotu, Ema Raiklaran Isin nia dale natutan tenik na'ak, "Yohanis, dala ida ne'e o musti makerek tenik hakerek ida. Hakerek nia lian nune'e:

'Bodik ema sarani sia iha kota Tiatira:

Hakerek ne'e nosi Ha'u, Yesus, mak Na'i Maromak Oan! Ha'ukaan matan laka nu'u ha'i. Ha'ukaan ain mean laak nu'u besi riti hamotu. Hanono Ha'u kdale ne'e.

<sup>19</sup> Karee emikaan moris ti'an. Emi hadomi Ha'u no fiar biit baa Ha'u. Emi moos tuir Ha'ukaan ukun nohuun. Masik ema nasusar emi moos, emi haterus aan bei-beik. Ha'u moos katene, oras ne'e emi serwisu maka'as liu tenik bodik Ha'u.

<sup>20</sup> Mais, emi monu baa lia ida, tan emi simu feto naran Isabel nia. Nia naksa'ek aan na'ak, nia, Maromak mako'an. Hotu emi habusik nia bosok nola Ha'ukaan ema sia nodi hanorin kale'uk, to'o sia nalo lia kfo'er no tuir naa haan mak sera baa ai'oi lulik.

<sup>21</sup> Ha'u kde'an feto nia hei-hein ti'an, nebee la'o nela sala nia, mais nia la no'uk.

<sup>22</sup> Mana di'a-di'ak. Oras ne'e Ha'u kakotu ti'an atu kastikar nia kodi moras ida, to'o nia la bele la'o nela toba fatin. Nunia moos, baa ema mahalo lia kfo'er no nia. Kalo sia

---

<sup>☆</sup> **2:17** Ema Isra'el Sai Nosi Mesir 16:14-15,33-34; Yohanis 6:48-50; Yesaya 62:2, 65:15



la la'o nela fetu aat nia, la kleur ona Ha'u moos kastikar sia.

<sup>23</sup> Ha'u moos atu ko'o fetu aat nia oan sia. Kodi nunia, emi makfiar hotu-hotu hatene ha'ak, Ha'u katene ema raiklaran neon ain. Ha'u moos atu selu baa emi tuir emikaan hahalok.✧

<sup>24</sup> Mais, emi seluk sia iha Tiatira la tuir fetu nia hanorin aat. Emi dudu fila hanorin funin nosi ema mak kaer ai tahan aat. Tan baa nia, Ha'u lalika de'an tenik emi,

<sup>25</sup> surak kaer metin emikaan fiar to'o kmai kikar.

<sup>26-27</sup> Ha'u atu kfoo beran bodik ema mak tuir Ha'u to'o mate. Beran nia, beran boot, manesak no beran mak Ha'u ketan kosi Ha'ukaan Ama kodi ukun ema klubun hotu-hotu iha raiklaran. Kalo ema sakar Ha'u, Ha'u kodi beran nia, Ha'u ksakar kikar sia, hanesan kodi kno'an besi, ta'e karoe sasanan rai.✧

<sup>28</sup> Ha'u moos atu foo fitun na'in baa emi.

<sup>29</sup> Hanono di'a-di'ak lia mak Maromak Kmalar Lulik katak baa ema sarani sia.'''

### 3

*Yesus solok hakerek baa ema sarani sia iha kota Sardis*

<sup>1</sup> Hotu, Ema Raiklaran Isin nia dale natutan tenik baa ha'u na'ak, "Yohanis, dala ida ne'e o musti makerek tenik hakerek ida. Hakerek nia lian nune'e:

'Bodik ema sarani sia iha kota Sardis:

Hakerek ne'e nosi Ha'u, mak Yesus. Ha'u ukun kodi Maromak Kmalar Lulik mak hanesan kmalar hitu. Ha'u moos kaer fitun matan hitu kodi Ha'ukaan liman. Hanono Ha'u kdale ne'e.

---

✧ **2:23** Kananuk Sia 7:10, 62:12; Yeremia 17:10    ✧ **2:26-27**  
Kananuk Sia 2:8-9

Karee ti'an emikaan hahalok iha Sardis nebaa. Ema dale na'ak, emi moris tuir Ha'ukaan beer. Mais tuir loos, emikaan hahalok la fatan no ema mak moris foun.

<sup>2</sup> Hanoin di'a-di'ak! Hetak hakbiit emikaan fiar mak kre'is atu mohu. Ha'u kleno ti'an emikaan hahalok sia. La noo ida moos mak loos iha Na'i Maromak oin.

<sup>3</sup> Keta halu'a hanorin loos mak emi simu ti'an hori uluk nia. Tuir tebe-tebes Na'i Maromak beer hodi la'o hela emikaan salan. Kalo emi la halo lai-lais nunia, emi la hadi'a aan baa oras Ha'u kmai kikar. Tan Ha'u kmai teki-tekis, nu'u ema na'ok mak emi la hanoin hola.✧

<sup>4</sup> Mais, emi balu iha Sardis sei moris loos, hanesan ema mak la nadoor faru. Tan lia nia, emi fatan tau faru mutin, la'o hamutuk ho Ha'u.

<sup>5</sup> Ema mak tuir Ha'u to'o mate, fatan tau faru mutin. Ha'u la ko'as niakaan naran kosi hakerek mak noo ema hotu-hotu naran mak atu moris nima-nimak no Na'i Maromak. Ha'u moos katak baa Ha'ukaan Ama no makbukar lale'an sia ka'ak, nia, Ha'ukaan ema.✧

<sup>6</sup> Hanono di'a-di'ak lia mak Maromak Kmalar Lulik katak baa ema sarani sia.'"

*Yesus solok hakerek baa ema sarani sia iha kota Filadelfia*

<sup>7</sup> Hotu, Ema Raiklaran Isin nia dale natutan tenik na'ak, "Yohanis, dala ida ne'e o musti makerek mola tenik hakerek ida seluk. Hakerek nia lian nune'e:

'Bodik ema sarani sia iha kota Filadelfia:

---

✧ **3:3** Mateus 24:43-44; Lukas 12:39-40; Lia Raiklaran Falu Fila 16:15 ✧ **3:5** Ema Isra'el Sai Nosi Mesir 32:32-33; Kananuk Sia 69:29; Lia Raiklaran Falu Fila 2:7, 20:12; Mateus 10:32; Lukas 12:8

Hakerek ne'e, nosi Ha'u, mak Yesus. Ha'u, mak moon no loos. Ha'u moos mak kaer Na'i Daud sabin. Kalo Ha'u kloke odamatan, la noo ema ida mak bele taka. Kalo Ha'u ktaka, la noo ema ida mak bele loke.✧

<sup>8</sup> Katene ti'an lia hotu-hotu mak emi halo. Ha'u moos katene ka'ak, ema la duun natene emi. Masik nunia moos, emi la heli Ha'u, mais emi tuir Ha'u nohuun. Mana di'a-di'ak, tan Ha'u kloke ti'an odamatan bodik emi. Dadi, la noo ema ida mak bele taka nikar.

<sup>9</sup> Hanono di'a-di'ak! Noo ema mak dale bosok na'ak, sia Na'i Maromak eman. Mais tuir loos, sia tuir diabun ulun. Emi lei haree! Ha'u atu kalo sia to'o nakni'a iha emikaan oin, nodi katak sain na'ak, Na'i Maromak nadomi emi tebes.✧

<sup>10</sup> Tan emi haterus aan hodi tuir Ha'ukaan Manfatin, Ha'u atu ksara kola emi nosi susar mak Na'i Maromak atu nodi koko ema raiklaran.

<sup>11</sup> La kleur ona, atu kmai kikar. Dadi, kaer metin Ha'ukaan hanorin mak emi simu hori uluk nia. Kalo tuir hanorin seluk, lia hotu-hotu mak Maromak nameno atu selu baa emi iha lale'an, lakon mohu.

<sup>12</sup> Ema mak tuir Ha'u to'o mate, sia atu nein no Na'i Maromak nima-nimak, hanesan ai rii boot mak taman iha Na'i Maromak Tofatik. Ha'u atu kakerek Ha'ukaan Maromak naran no Niakaan kota naran iha siakaan isin. Kota nia, Maromak natuun nosi lale'an. Ema temi kota nia na'ak, Yerusalem Foun. Ha'u moos atu kakerek Ha'ukaan naran foun iha siakaan isin.✧

✧ **3:7** Yesaya 22:22; Ayub 12:14 ✧ **3:9** Yesaya 49:23, 60:14, 43:4

✧ **3:12** Lia Raiklaran Falu Fila 21:2; Yesaya 62:2, 65:15

13 Hanono di'a-di'ak lia mak Maromak Kmalar  
Lulik katak baa ema sarani sia.'"

*Yesus solok hakerek baa ema sarani sia iha  
kota Laodikia*

14 Hotu, Ema Raiklaran Isin nia moos dale  
natutan tenik na'ak, "Yohanis, oras ne'e, o musti  
makerek mola hakerek tatakan. Hakerek nia  
lian nune'e:

'Bodik ema sarani sia iha kota Laodikia:

Hakerek ne'e nosi Ha'u, Yesus, mak ema temi  
na'ak, 'Loos Huun'. Ha'u kdale lo-loos  
Maromak Manfatin. Lia hotu-hotu mak  
Na'i Maromak nase'i, huun nosi Ha'u.✧

15 Karee ti'an emikaan hahalok iha Laodikia  
nebaa. Mais, emi nunabee?! Manas, lale;  
malirin moos, lale. Di'ak liu, kalo manas,  
manas tebe-tebes! Kalo malirin, malirin  
tebe-tebes!

16 Mais, tan emi tuir Ha'u hodi neon ruak, Ha'u  
atu kakbuut sai emi kosi Ha'ukaan ibun, hanesan  
ema nakbuut kaban.

17 Emi dale loko aan ha'ak, 'Ita ne'e, ema mak-  
soin. Ita moris di'a-di'ak. Sa-saa iha hotu!  
Mais tuir loos, emikaan neon naktomak  
ti'an, to'o emi la hatene tenik lia di'ak sia.  
Tan baa nia, emi dadi mukit no kwalan.

18 Di'ak liu, mai sosa hola mean isin hosi Ha'u,  
nebee emi dadi maksoin tebe-tebes. Sosa hola  
noo, faru mutin hodi taka hola emikaan kwalan  
nia. Sosa hola noo, ai tahan matan hodi ho'as  
emikaan matan, nebee emi bele haree hikar.

19 Ema mak Ha'u kadomi, kalo nalo sala, Ha'u  
kde'an kodi taa ukun baa nia, nebee nia

---

✧ 3:14 Lia Fuan Tate'an 8:22

bele nanorin aan. Dadi, emi musti haloos neon, tuir Ha'u hodi laran maluak.✧

20 Rona di'a-di'ak! Ha'u kariik ti'an iha odamatan oin. Ha'u kbolu atu tama. Kalo ema ida rona Ha'ukaan lian, hotu loke odamatan, Ha'u ktama baa kaa kamutuk ko nia.

21 Ema mak tuir Ha'u to'o mate, Ha'u klatan beran baa nia, nebee tuur kaer ukun namutuk no Ha'u. Tan Ha'u moos katerus aan tuir Ha'ukaan Ama, oras ne'e Ha'u ktuur kaer ukun kamutuk ko Nia.

22 Hanono di'a-di'ak lia mak Maromak Kmalar Lulik katak baa ema sarani sia.'"

## 4

### *Sia lo'u-sudur baa Na'i Maromak iha lale'an*

<sup>1</sup> Ema Raiklaran Isin nia dale notu, Na'i Maromak nalore lia seluk tenik. Ha'u karee odamatan ida nakloke iha lale'an. Hotu, krona tenik ema mahoo lian maka'as hanesan kfui dikur nia katak na'ak, "Mai! Sa'e ona! Ha'u atu katudu baa o lia hotu-hotu mak atu dadi."

<sup>2</sup> Baa oras nia moos, Maromak Kmalar Lulik foti nodi ha'u baa lale'an. Ha'u karee habesi aan fatin ida. Noo Ida tuur nabesi aan iha fatik nia.

<sup>3</sup> Nia naksinak ilas murak matak no mean, hanesan fatuk mahoo matan mak folin todan, mak ema temi na'ak fatuk *yaspis* no fatuk *sardius*. Baur tuik ida satan nola habesi aan fatin nia. Baur nia sinak noo ilas matak hanesan fatuk *samrud*.✧

<sup>4</sup> Iha nia moos noo kadera ukun rua nulu resin haat mak satan nola habesi aan fatin nia. Fukun na'in rua nulu resin haat tuur baa kadera nia

✧ **3:19** Lia Fuan Tate'an 3:12; Ibrani 12:6 ✧ **4:3** Yeskiel 1:26-28, 10:1

sia. Sia hotu-hotu tau faru mutin no sabeo nosi mean.

<sup>5</sup> Mameran tubu nosi habesi aan fatin iha klaran nia. Kokur moos taba tutan malu. Noo klonus lolon hitu mak laka iha habesi aan fatin oin. Klonus nia na'ak Maromak Kmalar Lulik, mak hanesan kmalar hitu.✧

<sup>6</sup> Ha'u ktitu-karee tenik hanesan noo tasi ida mak moon nu'u lalenok iha habesi aan fatin oin.

Hotu, ha'u ktitu-karee buat horis kasalak matan haat. Sia lituk habesi aan fatin nia nodi naliku Na'i Maromak. Buat nia sia, oin-kotuk nakonu mesan matan fuan.✧

<sup>7</sup> Buat nomer ida, oin hanesan busa fuik boot. Nomer rua, oin hanesan karau baka aman. Nomer tolu, oin hanesan ema raiklaran. Nomer haat, oin hanesan kikit maksemon.\* ✧

<sup>8</sup> Buat matan haat nia, ida-idak noo liras neen. Liras nia sia luan no laran nakonu mesan matan fuan. Loron-kalan buat nia sia nananu la nakotu na'ak,

“Ami tonu-haboot Na'i Maromak!

Ami foti-hahaas Na'i Maromak naran!

Na'i Maromak, mak Lulik Kaliuk!

Na'i Maromak, mak Beran Kaliuk.

Na'i Maromak, mak iha hori uluk.

Na'i Maromak, mak iha baa oras ne'e.

Na'i Maromak, mak iha to'o nima-nimak!”✧

---

✧ **4:5** Ema Isra'el Sai Nosi Mesir 19:16; Lia Raiklaran Falu Fila 1:4, 8:5, 11:19, 16:18; Yeskiel 1:1; Sakarias 4:2 ✧ **4:6** Yeskiel 1:22

\* **4:7** Ema matenek lia Hakerek Moon na'ak, buat horis kasalak matan haat nia lia isin nune'e: Busa fuik boot nia, mak beran kaliuk. Karau baka aman nia, mak biit kaliuk. Ema raiklaran nia, mak matenek kaliuk. No kikit nia, mak lais kaliuk. ✧ **4:7** Yeskiel 1:5-10, 10:14 ✧ **4:8** Yeskiel 1:18, 10:12; Yesaya 6:2-3

<sup>9</sup> Nodi nananu nunia, sia tonu no nakneter Na'i Maromak, no sera dodan baa Nia, tan Nia mak nabesi aan baa habesi aan fatin nia, no Nia mak iha to'o nima-nimak. Baa oras sia nananu,

<sup>10</sup> fukun na'in rua nulu resin haat nia moos sudur baa Na'i Maromak mak nabesi aan iha habesi aan fatin nia. Fukun sia loke siakaan sabeo, rai baa habesi aan fatin nia oin, nodi lo'u-sudur baa Nia mak iha hori nima-nimak to'o nima-nimak. Sia moos tonu-naboot Nia na'ak,

<sup>11</sup> "Aaa, Na'i Maromak!

Ami tonu-haboot Ita Boot!

Ami foti-hahaas Ita Boot naran.

Ita Boot mak amikaan Na'in.

Ita Boot mak amikaan Maromak!

Ita Boot mak fatan simu amikaan tonun.

Ita Boot mak fatan simu amikaan kneter.

Tan, Ita Boot mak Beran Kaliuk.

Tan, Ita Boot mak Boot Kaliuk.

Ita Boot mak hase'i hotu-hotu.

Ita Boot mak halo hotu-hotu moris.

Hotu-hotu mak iha,

dadi tan Ita Boot mak hase'i.

Hotu-hotu mak moris,

noo nawan tan Ita Boot mak foo."

## 5

### *Kananuk iha lale'an*

<sup>1</sup> Hotu, ha'u ktitu-karee kikar Nia mak nabesi aan iha habesi aan fatin nia. Nia kaer hakerek ida iha liman kwana. Hakerek nia, nakonu oin-kotuk. Hakerek nia moos lulun metin hodi hanit hitu.✧

<sup>2</sup> Hotu ha'u ktitu-karee makbukar lale'an maka'as ida. Nia nusu nodi lian maka'as na'ak,

✧ 5:1 Yeskiel 2:9-10; Yesaya 29:11

“See mak noo beran atu bele loke nodi leno hakerek nia?”

<sup>3</sup> Nusu nunia, mais la netan ema ida moos mak noo beran atu bele loke nodi leno hakerek nia isin. Iha lale'an no raiklaran, la noo ida kedan. Iha matebian fatin moos, la noo kedan.

<sup>4</sup> Ha'u ktitu-karee nunia, ha'u moos tanis karo'an aan, tan la noo ema ida kois mak noo beran atu bele loke nodi leno hakerek nia isin.

<sup>5</sup> Hotu, na'in ida nosi fukun rua nulu resin haat nia, dale no ha'u na'ak, “Hei, mau! Keta tanis. Mana lai! Noo Na'i Daud husar-binan maka'as ida mak ema temi na'ak, 'Busa fuik boot nosi husar-binan Yahuda'. Nia nabe'o mohu lia aat hotu-hotu. Nia mak noo beran loke hanit nia sia, nodi leno hakerek nia isin.”✧

<sup>6</sup> Ha'u krona hotu nunia, karee kola Bibi Malae Oan ida. Nia no'i nariik iha buat horis kasalak matan haat no fukun na'in rua nulu resin haat nia klaran. Bibi Malae Oan nia, nu'u ema no'o ti'an. Nia noo dikur hitu. Matan fuan, hitu. Matan fuan hitu nia, mak Maromak kmalar hitu mak Nia solok ti'an baa raiklaran tomak.✧

<sup>7</sup> Hotu, ha'u ktitu-karee Bibi Malae Oan nia baa natoru Nia mak nabesi aan iha habesi aan fatin. Nia nola hakerek lulun nia nosi Niakaan liman kwana.

<sup>8</sup> Baa oras nola, buat horis kasalak matan haat nia, no fukun na'in rua nulu resin haat nia, nakni'a nodi lo'u-sudur baa Nia. Sia ida-idak kaer bareka no mako ida halo hosi mean. Mako nia nakonu noo ai morin mak ema tunu nalo baa dubun morin. Dubun morin nia, mak Na'i Maromak eman siakaan hamulak.✧

---

✧ 5:5 Lia Uluk Fohon 49:9; Yesaya 11:1, 10 ✧ 5:6 Yesaya 53:7; Sakarias 4:10 ✧ 5:8 Kananuk Sia 141:2



<sup>9</sup> Hotu, sia hotu-hotu nananu kananuk foun ida na'ak:

“Bibi Malae Oan mak fatan simu hakerek ne'e.  
Bibi Malae Oan mak noo beran loke hanit iha hakerek nia.

Tan Nia kona ho'o ti'an.

Hotu, Na'i Maromak nodi raan,  
kasu ema raiklaran salan.

Hodi nunia, ema nosi hunun no klubun hotu-hotu

bele dadi Na'i Maromak eman.

Hodi nunia, ema mak dale nodi lia hotu-hotu iha rai hotu-hotu

bele dadi Na'i Maromak eman.✧

<sup>10</sup> Bibi Malae Oan libur nola sia ti'an,

dadi baa Niakaan hutun-renun.

Bibi Malae Oan boi nola sia ti'an,

dadi Na'i Maromak eman serwisu.

Sia atu kaer ukun iha raiklaran.

Sia atu serwisu bodik Na'i Maromak iha raiklaran.”✧

<sup>11</sup> Sia nananu hotu, ha'u kfoti oin. Ha'u krona kola lia maliak boot ida. Karee no buat horis kasalak matan haat nia, no fukun na'in rua nulu resin haat nia, no tenik, Maromak Niakaan makkbukar lale'an lear, to'o maliun-maliun.✧

<sup>12</sup> Sia hotu-hotu nananu nodi lian maka'as na'ak,

“Ami foti-hahaas Bibi Malae Oan mak kona ho'o.  
Nia mak fatan simu amikaan tonun!

Niakaan beran, boot kaliuk.

Niakaan sasoin, wa'in kaliuk.

Niakaan kakutak, matenek kaliuk.

Niakaan babiit, maka'as kaliuk.

---

✧ **5:9** Kananuk Sia 33:3, 98:1; Yesaya 42:10 ✧ **5:10** Ema Isra'el Sai Nosi Mesir 19:6; 1 Petrus 2:5,9; Lia Raiklaran Falu Fila 1:6

✧ **5:11** Daniel 7:10

Ami foti-hahaas Niakaan naran.

Ami sera kneter baa Nia.

Ami tonu-haboot Nia.”

<sup>13</sup> Sia nananu hotu, ha'u krona kola tenik kananuk seluk ida. Makmoris hotu-hotu iha lale'an, iha kalo'an, iha raiklaran, no iha tasi laran, foti lian nodi nananu. Ema nosi matebian fatin moos, tuir nananu. Sia nananu bele-bele na'ak,

“Ami tonu Na'i Maromak mak nabesi aan iha habesi aan fatin ne'e.

Ami moos foti-hahaas Bibi Malae Oan ne'e.

Ami sera kneter baa Sia.

Ami lo'u-sudur baa Sia.

Tan Sia mak kaer ukun nima-nimak!

Siakaan beran moos la mohu kois!”

<sup>14</sup> Hotu, buat horis kasalak matan haat nia, nataa bei-beik na'ak, “Tebes, nunia! Nia, tebes ti'an!” Fukun nia sia moos nakni'a tenik nodi lo'u-sudur baa Na'i Maromak no Bibi Malae Oan nia.

## 6

*Bibi Malae Oan loke hanit nia sia ida-idak Loke hanit nomer ida, meo ulun sai mai*

<sup>1</sup> Hotu, ha'u ktitu-karee Bibi Malae Oan nia loke hanit nomer ida iha hakerek lulun nia. Ha'u moos rona kola ida nosi buat horis kasalak matan haat nia, nahii nodi lian maka'as nu'u kokur. Nia naruka na'ak, “Baa ona!”

<sup>2</sup> Sarebak, ha'u ktitu-karee kuda mutik ida. Ema ida sa'e iha kuda nia. Nia tau sabeo meo ulun, tan Nia natoba nola funu bei-beik. Oras ne'e, Nia kaer rama, nodi baa natoba tenik funu iha raiklaran.☆

---

☆ 6:2 Sakarias 1:8, 6:3, 6

*Loke hanit nomer rua, tokar lauk moris iha raiklaran*

<sup>3</sup> Hotu, Bibi Malae Oan nia loke hanit nomer rua. Ha'u moos rona kola buat horis kasalak nomer rua naruka na'ak, "Baa ona!"

<sup>4</sup> Hotu, kuda meak lakan matan ida sai mai. Ema mak sa'e kuda nia simu nola surik naruk ida, tan sia latan beran baa nia atu baa tokar lauk iha raiklaran, to'o ema no'o malu.✧

*Loke hanit nomer tolu, rai salaen boot mosu*

<sup>5</sup> Hotu, Bibi Malae Oan nia loke hanit nomer tolu. Ha'u krona kola buat horis kasalak nomer tolu naruka na'ak, "Baa ona!" Sarebak, ha'u ktitu-karee kuda metan matan ida. Ema mak sa'e kuda nia kaer dasin ida, atu nodi tetu hahaak mak nahuu mohu ona iha raiklaran.✧

<sup>6</sup> Hotu, ha'u krona hanesan lia maliak ida mai nosi buat horis kasalak matan haat nia klaran. Lia maliak nia katak na'ak, "Rai salaen boot ida atu mosu iha raiklaran. To'o ema kansera loron ida, hodi sosa loos foos sasukat tolu dei. Kalo foos di'ak, hetan loos sasukat ida dei. Mais, oras rai salaen to'o, ema la bele nahaat ai saitun no ai anggor iha to'os."

*Loke hanit nomer haat, ema wa'in mate*

<sup>7</sup> Hotu, Bibi Malae Oan nia loke hanit nomer haat. Ha'u ktitu-karee buat horis kasalak nomer haat naruka na'ak, "Baa ona!"

<sup>8</sup> Sarebak, ha'u ktitu-karee kuda malahuk matan ida. Ema mak sa'e kuda nia naran 'Mate Huun'. Noo ida mak tuir nia nosi kotuk, naran 'Matebian Fatin'. Kalo sura ema hotu-hotu iha raiklaran, halo baa fa'ek haat, sia rua netan

beran atu no'o fa'ek ida. Bele no'o nodi surik, nodi rai salaen, nodi moras, no nodi asu fuik.☆

*Loke hanit nomer lima, Na'i Maromak eman sia kona ho'o*

<sup>9</sup> Hotu, Bibi Malae Oan nia loke hanit nomer lima. Ha'u ktitu-karee matebian sia iha hadak sera ohak. Uluk, sia kona ho'o tan fiar Na'i Maromak nodi keke bei-beik Niakaan Manfatin.

<sup>10</sup> Sia nahii na'ak, "Aaa Maromak, amikaan Na'in Maka'as! Ita Boot mak Moon! Ita Boot mak Loos! Mais ami musti hein to'o wain hira tenik, foin Ita Boot kastikar ema mak no'o ami iha raiklaran?"

<sup>11</sup> Nusu notu nunia, sia ida-idak simu faru klobor mutin. Hotu sia rona ida mak katak sain baa sia na'ak, "Hein tenik lai, tan sei noo emikaan mamaluk sia mak atu kona ho'o hanesan emi. Hein to'o sia hotu-hotu kona ho'o ti'an lai, foin Ha'u kastikar ema mak no'o emi."

*Loke hanit nomer neen, dinu moris iha lale'an no raiklaran*

<sup>12</sup> Hotu, Bibi Malae Oan nia loke hanit nomer neen. Sarebak, ha'u ktitu-karee kakekuk boot. Loro nakukun, hanesan hene metan. Fulan moos mean, hanesan raa.☆

<sup>13</sup> Fitun sia iha lale'an monu tuun baa raiklaran, hanesan ai fuan matak nakoran, tan anin maka'as.

<sup>14</sup> Ha'u moos titu-karee lale'an naksaki fa'e rua, hotu naklulun hanesan biti to'o mohu. Foho no rai hotu-hotu moos nakdoko to'o lakon.☆

---

☆ **6:8** Yeskiel 14:21 ☆ **6:12** Lia Raiklaran Falu Fila 11:13, 16:18; Yesaya 13:10; Yoel 2:10,31, 3:15; Mateus 24:29; Markus 13:24-25; Lukas 21:25 ☆ **6:14** Yesaya 34:4; Lia Raiklaran Falu Fila 16:20

15 Titu-naree nunia, ema hotu-hotu iha raiklaran nata'uk. Nahuu nosi na'in, ukunrai ulun, sondadu ulun, no ema maksoin to'o ata sia. Hotu-hotu nata'uk. Sia nalai baa nakfunin iha fatuk kuak no fatuk leet iha foho.✧

16 Sia naruka foho no fatuk boot sia na'ak, "Taka hola ami ona! Subar hola ami, nebee Nia mak nabesi aan iha habesi aan fatin nia, la bele naree ami tenik. Hodi nunia, Bibi Malae Oan nia la kastikar ami.✧

17 Adeei! Ami susar tebes ona, tan loron dinu mai ti'an! Na'i Maromak no Bibi Malae Oan atu fakar hahibun baa ami ona. La noo ida mak bele sasin, tan ami hotu-hotu nanis mate!"✧

## 7

*Na'i Maromak tau marak baa Niakaan ema na'in rihun atus ida haat nulu resin haat, nebee sia keta kona dinu*

1 Hotu, ha'u ktitu-karee makbukar lale'an na'in haat nariik baa raiklaran lidun haat. Sia saseni anin, nebee anin lalika nuu iha tasi, iha rai maran, no iha alas.✧

2 Na'i Maromak latan beran baa sia atu nadodok rai maran no tasi. Hotu, ha'u ktitu-karee makbukar lale'an ida tenik mai nosi lorosa'e. Nia nodi marak nosi Na'i Maromak mak moris nima-nimak. Nia nahii baa makbukar na'in haat nia na'ak,

3 "Hein lai to'o ami tau marak baa Na'i Maromak eman sia baboton, nebee sia keta kona dinu. Hotu ti'an, foin emi bele hahaat rai maran, no tasi, no alas sia."✧

---

✧ 6:15 Yesaya 2:19, 21 ✧ 6:16 Hosea 10:8; Lukas 23:30 ✧ 6:17 Yoel 2:11; Maleaki 3:2 ✧ 7:1 Yeremia 49:36; Daniel 7:2; Sakarias 6:5 ✧ 7:3 Yeskiel 9:4, 6

<sup>4</sup> Hotu, ha'u krona ka'ak, makbukar nia sia marak nola ema na'in rihun atus haat haat nulu resin haat. Sia nia, husar-binan Isra'el, mak ne'e:

<sup>5</sup> nosi uma huun Yahuda, ema na'in rihun sanulu resin rua;

nosi uma huun Ruben, ema na'in rihun sanulu resin rua;

nosi uma huun Gad, ema na'in rihun sanulu resin rua;

<sup>6</sup> nosi uma huun Aser, ema na'in rihun sanulu resin rua;

nosi uma huun Naftali, ema na'in rihun sanulu resin rua;

nosi uma huun Manase, ema na'in rihun sanulu resin rua;

<sup>7</sup> nosi uma huun Simeon, ema na'in rihun sanulu resin rua;

nosi uma huun Lewi, ema na'in rihun sanulu resin rua;

nosi uma huun Isakar, ema na'in rihun sanulu resin rua;

<sup>8</sup> nosi uma huun Sebulon, ema na'in rihun sanulu resin rua;

nosi uma huun Yusuf, ema na'in rihun sanulu resin rua;

no nosi uma huun Benyamin, ema na'in rihun sanulu resin rua.

*Em a moon sia tonu-naboot Na'i Maromak no Bibi Malae Oan*

<sup>9</sup> Hotu, sarebak ha'u ktitu-karee ema lear. Sia wa'in basuk, to'o la bele sura hola. Sia mai nosi klubun hotu-hotu, nosi hunun hotu-hotu, no nosi ema mak dale nodi lia hotu-hotu nosi rai hotu-hotu. Sia libur malu se'i oin baa habesi aan fatin

nia no Bibi Malae Oan nia. Sia tau faru mutin,  
no kaer beet tahan.

<sup>10</sup> Sia foti tonun bele-bele na'ak,  
“Ami tonu-haboot amikaan Maromak  
mak nabesi aan iha habesi aan fatin ne'e.  
Ami moos foti-hahaas  
Bibi Malae Oan ne'e.  
Sia ne'e, mak sori ami.  
Sia ne'e, mak loke dalan moris bodik ami.”

<sup>11</sup> Dale hotu nunia, Maromak Niakaan mak-  
bukar lale'an mak nariik satan nola sia, nakni'a  
nodi sudur se'i oin baa habesi aan fatin nia.  
Fukun nia sia no buat horis kasalak matan haat  
nia moos, nalo nunia. Sia hotu-hotu lo'u-sudur  
baa Na'i Maromak

<sup>12</sup> nodi na'ak,  
“Tebes! Nunia, tebes!  
Ami moos tonu-haboot Na'i Maromak!  
Ami moos foti-hahaas Niakaan naran!  
Na'i Maromak hanoin, matenek kaliuk.  
Na'i Maromak beran, boot kaliuk.  
Na'i Maromak maka'as, biit kaliuk.  
Ami sera dodan baa Na'i Maromak nohuun.  
Ami sera kneter baa Ama Maromak nima-  
nimak.”

<sup>13</sup> Sia tonun hotu nunia, ida nosi fukun nia sia  
nusu ha'u na'ak, “O matene ema lear mak tau  
faru mutin ne'e sia ka lale? Sia nosi nabee?”

<sup>14</sup> Mais ha'u kataa ka'ak, “Lale, Ama. Ha'u la  
katene sia.”

Nia moos katak baa ha'u na'ak, “Sia nia, ema  
mak sasin ti'an nosi dinu boot.  
Sia nia, ema mak nodi Bibi Malae Oan raan,  
atu fasi siakaan tais,  
nodi namutin siakaan faru.✧

---

✧ **7:14** Daniel 12:1; Mateus 24:21; Markus 13:19

- 15 Tan baa nia, sia bele nariik iha Na'i Maromak habesi aan fatin oin.  
Loron-kalan sia naliku Nia iha Niakaan Uma Hamulak.  
Nia namutuk no sia nohuun.  
Nia daka sia bei-beik.
- 16 Sia la noran salaen ona.  
Sia la noran hanroo ona.  
Sia la namotuk ona, tan loro manas.  
Siakaan isin kulit la nakfolu ona, tan kona manas.✧
- 17 Bibi Malae Oan mak kre'is habesi aan fatin nia, atu dadi siakaan makbalin.  
Nia atu nala'o nodi sia,  
baa nemu iha wee matan mak nalo ema moris nohuun.  
Na'i Maromak moos atu kasu mohu siakaan susar,  
nebee sia la tanis ona."✧

## 8

*Loke hanit nomer hitu, makbukar lale'an sia simu nola kfui dikur hitu*

<sup>1</sup> Hotu, Bibi Malae Oan nia loke hanit nomer hitu. Sarebak, hotu-hotu iha lale'an no-nook. La noo ida mak nasai lian, to'o kre'is tuku balun ida.

<sup>2</sup> Hotu, ha'u ktitu-karee makbukar lale'an na'in hitu mak nariik bei-beik iha Na'i Maromak oin, nadi'a aan naliku Nia. Sia ida-idak simu kfui dikur.

<sup>3</sup> Hotu, makbukar lale'an ida seluk baa nariik iha hadak ida oin. Hadak nia, halo hosi mean. Sia nodi tunu ai morin raan. Makbukar nia kaer mako mean ida mak ai morin raan fatin. Hotu,

---

✧ 7:16 Yesaya 49:10 ✧ 7:17 Kananuk Sia 23:1-2; Yeskiel 34:23; Yesaya 49:10; Yesaya 25:8



sia foo baa nia ai morin raan wa'in lear, nebee kahur no Na'i Maromak eman siakaan hamulak. Hotu, nia nodi mako mean nia hanesan sera nuhar morin, rai baa hadak nia leten, iha habesi aan fatin nia oin.✧

<sup>4</sup> Hotu, nia tunu ai morin raan nia. Knuhar morin sa'e baa Na'i Maromak oin, namutuk no Na'i Maromak eman siakaan hamulak hotu-hotu.

<sup>5</sup> Hotu, makbukar nia nola ha'i nosi hadak nia, tau baa mako mean nia, nalo nakonu. Hotu, fakar mako isin baa raiklaran. Sarebak, ha'u ktitu-karee mameran botu karuk-kwana baa raiklaran. Kokur tarutu maka'as natutan malu, no kakekuk boot.✧

<sup>6</sup> Hotu, makbukar lale'an na'in hitu nadi'a aan atu nuu siakaan kfui dikur.

*Huu kfui dikur nomer ida, alas no hae namotuk*

<sup>7</sup> Baa oras makbukar nomer ida nuu niakaan kfui dikur, udan fatuk no ha'i kahur raa nakfakar baa raiklaran, to'o alas no hae namotuk mohu. Kalo fa'e raiklaran halo baa fa'ek tolu, mak namotuk nia, fa'ek ida.✧

*Huu kfui dikur nomer rua, tasi laran isin mate*

<sup>8</sup> Baa oras makbukar nomer rua nuu niakaan kfui dikur, buat ida hanesan foho boot mak laka, soe aan baa tasi laran. Hotu, tasi dadi raa. Kalo fa'e raiklaran halo baa fa'ek tolu, tasi hotu-hotu mak dadi baa raa nia, fa'ek ida.

<sup>9</sup> Hotu, buat horis tasi laran hotu-hotu iha fa'ek nia mate mohu. Roo hotu-hotu mak iha fa'ek nia moos, dodok hotu.

---

✧ **8:3** Amos 9:1; Ema Isra'el Sai Nosi Mesir 30:1, 3 ✧ **8:5** Ukun-badu Na'ilulik 16:12; Yeskiel 10:2; Ema Isra'el Sai Nosi Mesir 19:16; Lia Raiklaran Falu Fila 11:19, 16:18 ✧ **8:7** Ema Isra'el Sai Nosi Mesir 9:23-25; Yeskiel 38:22

*Huu kfui dikur nomer tolu, wee dadi moru*

<sup>10-11</sup> Baa oras makbukar nomer tolu nuu niakaan kfui dikur, fitun boot ida monu nosi lale'an, hanesan klonus boot ida laka. Fitun nia naran 'Moru'. Baa oras monu, wee mota no wee matan dadi moru. Hotu, ema mak nemu wee nia, mate wa'in. Kalo fa'e mota no wee matan hotu-hotu iha raiklaran, halo baa fa'ek tolu, mak dadi moru nia, fa'ek ida.✧

*Huu kfui dikur nomer haat, loro, fulan no fitun nakukun luri*

<sup>12</sup> Hotu, makbukar nomer haat nuu niakaan kfui dikur. Sarebak, loro, fulan no fitun sia kona ta'e, hotu nakukun. Kalo sura oras loron, halo baa fa'ek tolu, fa'ek ida nakukun, tan loro matan la laka tenik ona. Kalo sura oras kalan, halo baa fa'ek tolu, fa'ek ida nakukun luri, tan fulan no fitun la laka ona.✧

<sup>13</sup> Hotu, ha'u kfoti oin, ha'u ktitu-karee kikit matan ida semo aas iha kalo'an, nodi nakrake na'ak, "Susar liu! Susar liu! Dinu boot atu monu kona ema mak moris iha raiklaran, tan makbukar na'in tolu seluk atu kre'is nuu siakaan kfui dikur."

**9***Huu kfui dikur nomer lima, kala'ek nasusar ema raiklaran*

<sup>1</sup> Hotu, makbukar nomer lima nuu niakaan kfui dikur. Ha'u ktitu-karee fitun ida monu tuun baa raiklaran, to'o kuak boot mak la noo nidin. Hotu, sia foo sabi baa fitun nia atu nodi loke kuak nia odamatan.

---

✧ **8:10-11** Yesaya 14:12; Yeremia 9:15      ✧ **8:12** Yesaya 13:10; Yeskiel 32:7; Yoel 2:10,31, 3:15

<sup>2</sup> Loke odamatan ti'an, ha'i dubun metan ma'ar sai mai. Dubun nia boot, hanesan alas namotuk dubun. Ha'i dubun nia nakfolo fu-fu'ak sa'e, to'o kalo'an no loro matan nakukun.✧

<sup>3</sup> Hotu, kala'ek lear boot semo sai nosi ha'i dubun nia, monu baa raiklaran. Na'i Maromak latan beran baa sia hanesan sakunar.✧

<sup>4</sup> Mais, Nia kahi nebee keta nahaat hae, keta nahaat alas no ai horis seluk sia iha raiklaran. Nia latan beran baa sia nasusar loos ema mak la noo Niakaan marak iha baboton.✧

<sup>5</sup> Sia musti nasusar ema nia sia, to'o fulan lima laran. Mais, la bele no'o. Nahoras loos, hanesan sakunar tata.

<sup>6</sup> Oras ema kona susar nia, sia la bele terus, to'o nakara mate dei. Mais sia la mate.✧

<sup>7</sup> Hotu, ha'u ktitu-karee kala'ek nia sia ilas, hanesan kuda hatuda mak tau sabeo meo ulun, halo hosi mean. Kala'ek oin, nu'u ema.✧

<sup>8</sup> Fuuk naruk, hanesan feto fuuk. Ne'an meik, hanesan busa fuik boot ne'an.✧

<sup>9</sup> Kala'ek nia sia, nu'u tau besi heli karas. Liras nakbasak boot, hanesan sondadu klibur boot ida kudan dada kareta hatuda nodi nalai.✧

<sup>10</sup> Siakaan ikun noo raso, hanesan sakunar. Sia netan beran atu nasusar ema nodi raso nia, to'o fulan lima laran.

<sup>11</sup> Kala'ek nia sia moos noo na'in mak kaer ukun baa kuak boot mak la noo nidin nia. Iha lia Ibrani, niakaan naran na'ak *Abaddon*. Iha lia Yunani na'ak *Apolion*. Ne'e na'ak, "Madodok Teen".

---

✧ 9:2 Lia Uluk Fohon 19:28 ✧ 9:3 Ema Isra'el Sai Nosi Mesir 10:12-15 ✧ 9:4 Yeskiel 9:4 ✧ 9:6 Ayub 3:21; Yeremia 8:3 ✧ 9:7 Yoel 2:4 ✧ 9:8 Yoel 1:6 ✧ 9:9 Yoel 2:5

<sup>12</sup> Hodi nunia, dinu uluk fohon, siku liu. Mais, sintidu! Tan dinu rua tenik, sei iha ikus.

*Huu kfui dikur nomer neen, susar oik tolu iha raiklaran*

<sup>13</sup> Hotu, makbukar nomer neen nuu niakaan kfui dikur. Ha'u ktitu-karee hadak mean mak sia nodi tunu ai morin raan. Hadak nia se'i oin baa Na'i Maromak. Hotu, lia maliak ida sai nosi hadak nia lidun haat,<sup>☆</sup>

<sup>14</sup> katak baa makbukar mak foin nuu kfui dikur nia na'ak, "Maromak Niakaan makbukar na'in haat kesi kleur ti'an iha mota boot ida, naran Efrat. Baa mabusik sia ona!"

<sup>15</sup> Hotu, makbukar nia baa nabusik sia, nebee sia baa no'o ema raiklaran. Hodi nunia, sia no'o ema kona baa tinan, fulan, loron no tuku mak Na'i Maromak nakotu kedan ti'an. Kalo fa'e ema hotu-hotu iha raiklaran halo baa fa'ek tolu, mak mate baa oras nia, fa'ek ida.

<sup>16</sup> Hotu, sia katak baa ha'u na'ak, makbukar niakaan sondadu mak sa'e kuda hatuda, na'in miliun atus rua.

<sup>17</sup> Hotu, ha'u ktitu-karee sondadu nia sia no siakaan kuda. Sondadu sia tau heli karas mean laak, flahuk maksinak, no modok lakan. Kuda sia ulun, hanesan busa fuik boot ulun. Ha'i, ha'i dubun, no fatuk ha'i lobot nakbuut sai nosi nunun

<sup>18</sup> atu natuun susar oik tolu iha raiklaran. Kalo fa'e ema raiklaran halo baa fa'ek tolu, susar oik tolu nia atu no'o mohu fa'ek ida.

<sup>19</sup> Iha kuda ikun, noo ulun hanesan samea ulun. Hotu, kuda nia sia baa nasusar ema raiklaran nodi nunun no ikun.

---

<sup>☆</sup> **9:13** Ema Isra'el Sai Nosi Mesir 30:1-3

<sup>20</sup> Mais, sei noo ema seluk iha raiklaran mak la mate nodi dinu nia sia. Masik sia kona dinu moos, sia la no'uk la'o nela siakaan a'aat. Sia lo'u baa diabu nohuun, no lo'u baa saa mak sia nalo nosi mean, nosi mutin, nosi besi riti, nosi fatuk no ai. Masik buat nia sia la bele naree, la bele rona, no la bele la'o, sia lo'u baa bei-beik.✧

<sup>21</sup> Sia moos la nanawa nosi sala seluk sia. Sia la nanawa no'o ema. Sia la nanawa tau matenek kukun. Sia la nanawa nalo lia kfo'er. No sia la nanawa nana'o.

## 10

### *Makbukar lale'an no hakerek lulun ki'ik*

<sup>1</sup> Hotu, ha'u ktitu-karee Maromak Niakaan makbukar maka'as ida tuun mai nosi lale'an. Kalo'an nakalus nola nia. Baur moos satan nola ulun. Oin naksinak, hanesan loro. Ain moos laka, hanesan ha'i.

<sup>2</sup> Nia nariik nodi ain kwana baa tasi, ain karuk baa rai maran. Nia kaer hakerek lulun ki'ik oan ida mak nakloke ti'an.

<sup>3</sup> Hotu, nia nahii nodi lian maka'as, hanesan busa fuik boot soo. Nahii notu, kokur nataa natutan dala hitu.

<sup>4</sup> Baa oras kokur nataa, ha'u atu kakerek kola siakaan dalen. Mais, ha'u krona kola lia maliak ida nosi lale'an nakahik na'ak, "Hoi! O keta katak kokur hitu nia siakaan dalen baa ema! O moos la bele makerek mola."

<sup>5</sup> Hotu, makbukar mak nariik nodi ain ida baa tasi, ida baa rai maran nia, foti niakaan liman kwana baa lale'an, nodi narai aan na'ak,

---

✧ **9:20** Kananuk Sia 115:4-7, 135:15-17; Daniel 5:23

<sup>6</sup> “Ha'ukaan dalen ne'e, tebes nanis! Karai aan kodi Na'i Maromak naran, tan Nia mak moris nima-nimak! Nia mak nase'i lale'an no raiklaran no sasoin hotu-hotu. Tan lia nia, hanono di'a-di'ak! Loron mak ita hein nia, kre'is mai ona.

<sup>7</sup> Kalo makbukar nomer hitu nuu ti'an niakaan kfui dikur; Na'i Maromak atu nala'ok Niakaan lia kakotun. Uluk fohon ema sei la natene dauk lia kakotun nia. Mais oras ne'e, Nia katak ti'an lia nia baa Niakaan mako'an sia mak naliku Nia. Dadi, hanono di'a-di'ak, tan Ha'ukaan dalen ne'e, tebes!”<sup>☆</sup>

<sup>8</sup> Hotu, lia maliak mak ha'u krona kosi lale'an nia, dale nikar tenik na'ak, “Yohanis! O baa makbukar lale'an mak nariik nodi ain ida baa tasi, ida baa rai maran nia, hotu mola hakerek lulun ki'ik mak nakloke iha liman nia.”

<sup>9</sup> Krona kola nunia, ha'u kbaa makbukar nia. Ha'u kusu hakerek nia. Hotu, nia katak baa ha'u na'ak, “Mola baa, maa ona! Atu moran midar iha okaan ibun, hanesan wani ween. Mais, moru iha okaan kabun laran.”

<sup>10</sup> Nia dale notu nunia, ha'u ksimu kola hakerek nia kosi liman. Hotu, kaa kola kedas. Iha ha'ukaan ibun, koran midar tebes, hanesan wani ween. Mais oras ha'u ktolan ti'an, koran moru iha kabun laran.<sup>☆</sup>

<sup>11</sup> Hotu, sia naruka ha'u na'ak, “O musti fila mikar, katak kedan saa mak Na'i Maromak atu nalo iha raiklaran. Katak lia saa mak atu dadi baa na'in hotu-hotu, baa ema nosi klubun hotu-hotu, baa ema nosi hunun hotu-hotu no baa ema mak dale nodi lia hotu-hotu iha raiklaran.”

---

<sup>☆</sup> **10:7** Ema Isra'el Sai Nosi Mesir 20:11; Hanoin Hikar Dalam Moris 32:40; Daniel 12:7; Amos 3:7    <sup>☆</sup> **10:10** Yeskiel 2:8—3:3

# 11

## *Maromak mako'an maka'as na'in rua*

<sup>1</sup> Hotu, sia lolo baa ha'u ai sasukat naruk ida hanesan kno'an. Na'i Maromak moos naruka ha'u na'ak, "Yohanis, madeer ona! Baa sukat Ha'ukaan Uma Hamulak no hadak sera iha kota Yerusalem. O moos sura mola ema hotu-hotu mak namulak iha nia.✧

<sup>2</sup> Mais, lalika sukat Uma Hamulak lalawar, tan fatin nia fa'e ti'an, foo baa ema klubun seluk mak la natene Ha'u. Sia atu sama nasobos Ha'ukaan kota moon, to'o fulan haat nulu resin rua laran (ne'e mak, loron rihun ida, atus rua neen nulu).✧

<sup>3</sup> Oras nia moos, Ha'u ksolok Ha'ukaan ema na'in rua, nebee sia dadi Ha'ukaan mako'an iha nia. Sia atu natais hene metan susar, nodi dale Ha'ukaan lia, to'o loron rihun ida, atus rua neen nulu nia siku."

<sup>4</sup> Maromak mako'an Sakaria nakerek kedan hori uluk nosi mako'an na'in rua nia. Nia natetek nodi ai saitun huun rua, no badut sasukun rua mak nariik se'i oin baa Maromak mak dadi Na'in baa ema raiklaran hotu-hotu.✧

<sup>5</sup> Kalo ema beer nase'i dinu baa Maromak mako'an na'in rua ne'e, ha'i atu sai nosi mako'an siakaan ibun, namotu sia hotu-hotu. Hodi nunia, sia nanis mate.

<sup>6</sup> Baa oras nia moos, Na'i Maromak latan beran baa mako'an na'in rua nia atu sena udan. Nia moos latan beran atu nalo wee matan dadi raa, no beran atu nodi susar oi-oik baa raiklaran ne'e, tuir siakaan hakara dei.✧

---

✧ **11:1** Yeskiel 40:3; Sakarias 2:1-2 ✧ **11:2** Lukas 21:24 ✧ **11:4** Sakarias 4:3,11-14 ✧ **11:6** 1 Na'i Isra'el Sia 17:1; Ema Isra'el Sai Nosi Mesir 7:17-19; 1 Samuel 4:8

7 Siakaan loron serwisu siku ti'an, buat fuik kasalak matan ida atu sai nosi kuak boot mak la noo nidin nia. Nia atu natuda sakar sia, to'o natoba nola, no no'o sia.✧

8-9 Hodi nunia, sia mate iha kota boot ida. Uluk ema no'o siakaan Maromak baa ai karuus iha kota nia. Kota nia dadi baa kota aat ti'an, hanesan Sodom no Mesir baa otas uluk. Oras mako'an rua nia mate, ema soe lerek siakaan maten iha dalan tehen. Hotu, ema nosi klubun hotu-hotu, ema nosi hunun hotu-hotu, no ema mak dale nodi lia hotu-hotu nosi rai hotu-hotu mai nobun maten rua nia, to'o loron tolu no balun laran. Sia nakahik ema nakoi maten rua nia,✧

10 tan sia beer basuk nobun maten rua nia. Tan uluk, ema rua nia nasusar ema hotu-hotu iha raiklaran. Dadi, ema nadahur bele-bele maten nia sia, nodi foo parsen baa malu.

11 Mais, loron tolu no balun nia siku ti'an, Na'i Maromak foo nikar nawan baa mako'an rua nia, nebee sia moris nikar. Ema hotu-hotu mak naree sia, kiki mate.✧

12 Hotu, mako'an rua nia atu rona lia maliak maka'as ida nosi lale'an, naruka sia na'ak, "Hei! Sa'e mai ona!" Sia moos ni'it aan sa'e baa lale'an no kalo'an nakalus nola sia. Naree nunia, siakaan funu sia ibun nakaka loos.✧

13 Sarebak, kakekuk boot moris. Uma moos nakro'on. Kalo sura uma hotu-hotu iha kota nia, halo baa fa'ek sanulu, fa'ek ida nakro'on. Ema na'in rihun hitu moos mate. Ema mak la mate,

---

✧ 11:7 Daniel 7:7; Lia Raiklaran Falu Fila 13:5-7, 17:8; Daniel 7:21

✧ 11:8-9 Yesaya 1:9-10 ✧ 11:11 Yeskiel 37:10 ✧ 11:12 2 Na'i Isra'el Sia 2:11



nata'uk tebe-tebes. Hotu, sia foo kneter baa Na'i Maromak, tan Nia mak kaer ukun iha lale'an.☆

<sup>14</sup> Hodi nunia, dinu nomer rua liu ti'an. Mais sintidu, tan dinu nomer tolu sei iha ikus.

*Huu kfui dikur nomer hitu, Na'i Maromak no Yesus Kristus kaer ukun iha raiklaran*

<sup>15</sup> Nunia hotu, makbukar lale'an nomer hitu nuu niakaan kfui dikur. Sarebak, ha'u krona kola lia maliak wa'in mai bele-bele nosi lale'an na'ak, "Oras ne'e, itakaan Na'i Maromak no Kristus mak Nia boi kedan hori uluk, mak kaer ukun hotu-hotu iha raiklaran. Nia atu kaer ukun hanesan Na'in, to'o nimanimak."☆

<sup>16</sup> Iha nia moos, fukun na'in rua nulu resin haat mak tuur iha siakaan kadera ukun iha Na'i Maromak oin. Sia moos rona lia maliak nia sia. Hotu, sia nakni'a nodi sudur, hotu tonu-naboot Na'i Maromak

<sup>17</sup> na'ak,  
"Aaa, Na'i Maromak!  
Amikaan Na'i!  
Amikaan Maromak!

Ita Boot mak ukun hotu-hotu.  
Ita Boot mak kaer beran baa hotu-hotu.  
Ita Boot mak moris hori uluk aan.  
Ita Boot mak moris baa oras ne'e.  
Ami sera dodan baa Ita Boot,  
tan Ita hodi beran boot,  
kaer ukun iha raiklaran.

<sup>18</sup> Ema klubun seluk sia krakat,  
tan la no'uk tuir Ita Boot.  
Oras ne'e, Ita Boot moos hahibu,  
tan sia la no'uk natene Ita Boot.

---

☆ **11:13** Lia Raiklaran Falu Fila 6:12, 16:18 ☆ **11:15** Ema Isra'el Sai Nosi Mesir 15:18; Daniel 2:44, 7:14,27

Oras ne'e, Ita Boot oras to'o ti'an,  
 atu kastikar sia mak la no'uk titu Ita Boot.  
 Oras ne'e, Ita Boot oras to'o ti'an,  
 atu nadodok sia mak nadodok ema seluk.  
 Oras ne'e, Ita Boot oras to'o ti'an,  
 atu hakotu lia bodik ema mak mate ti'an.  
 Oras ne'e, Ita Boot oras to'o ti'an,  
 atu selu ata kolen.  
 Ne'e mak, Ita Boot mako'an sia,  
 no Itakaan ema sia,  
 ki'ik-boot, matas-lawarik.

Ita Boot atu selu baa ema hotu-hotu,  
 mak foo kneter baa Ita Boot."✧

<sup>19</sup> Tonu-naboot hotu, ha'u ktitu-karee Na'i Maromak Niakaan Uma Hamulak iha lale'an. Odamatan nakloke ti'an. Ha'u moos titu-karee ai balun, mak uluk sia nodi nahulin Na'i Maromak Ukun Sanulu, mak hakerek iha fatuk. Mameran moos taba tutan malu baa-mai. Kokur botu maka'as simu malu. Raiklaran nawae no udan fatuk boot nakfakar nosi lale'an.✧

## 12

### *Samea inan natuda sakar feto no oan*

<sup>1</sup> Nunia hotu, sarebak ha'u ktitu-karee tadak kasalak ida mosu iha lale'an. Ema raiklaran sei la dala ida dauk naree tadak oin nunia. Ha'u karee feto ida, loro nakalus nola. Nia rai ain baa fulan. Nia tau sabeo mahoo fitun matan sanulu resin rua.

<sup>2</sup> Nia moos ko'us. Nia no'i tanis, tan moras atu nahoris.

<sup>3</sup> Sarebak, ha'u ktitu-karee tenik tadak kasalak seluk. Samea inan mean boot ida mosu iha

---

✧ **11:18** Kananuk Sia 2:5, 110:5, 115:13    ✧ **11:19** Lia Raiklaran Falu Fila 8:5, 16:18, 16:21

lale'an. Nia ulun hitu, dikur sanulu. Nia tau sabeo na'in baa ulun hitu nia sia.✧

<sup>4</sup> Nodi ikun saar namoos fitun nia sia, to'o nalakon fa'ek ida nosi fa'ek tolu iha lale'an. Hotu, samea inan nia le'ak fitun nia sia baa raiklaran. Hotu, nia baa nariik se'i oin baa fetu nia, atu nein to'o nahoris, tan atu folan nola kedas oan nia.✧

<sup>5</sup> Hotu, fetu nia nahoris nola oan mane ida. Mais Maromak Niakaan makbukar lale'an ida mai nadau nola, nodi baa Na'i Maromak, nebee oan nia kaer ukun namutuk no Nia iha lale'an. Oan nia atu ukun ema klubun hotu-hotu iha raiklaran nodi beran mak boot kaliuk.✧

<sup>6</sup> Hotu, fetu nia moos nalai baa fatin mamuk ida mak Na'i Maromak nadi'a ti'an bodik nia. Hotu, naliku nia iha nia to'o tinan tolu no balun (ne'e na'ak, loron rihun ida atus rua neen nulu).

*Mikael natuda sakar samea inan iha lale'an*

<sup>7</sup> Hotu, hatuda boot moris iha lale'an. Noo Maromak Niakaan makbukar lale'an siakaan meo ulun ida, naran Mikael. Mikael no maktuir sia natuda sakar samea inan nia no niakaan maktuir sia.✧

<sup>8</sup> To'o ikus, Mikael sia natoba nola samea inan nia no niakaan maktuir sia. Mikael sia nakahik, nebee keta nein iha lale'an tenik.

<sup>9</sup> Hotu, te'ur sai sia nosi lale'an, soe lakon baa raiklaran. Hanono! Samea inan nia, mak diabu ulun. Hori uluk aan, nia mak tolek nola ema raiklaran monu baa sala.✧

<sup>10</sup> Nunia hotu, ha'u krona tenik lia maliak maka'as ida nosi lale'an na'ak,

---

✧ 12:3 Daniel 7:7 ✧ 12:4 Daniel 8:10 ✧ 12:5 Yesaya 66:7; Kananuk Sia 2:9 ✧ 12:7 Daniel 10:13,21, 12:1; Yudas 9 ✧ 12:9 Lia Uluk Fohon 3:1; Lukas 10:18

“Uluk, samea inan nia nariik iha Na'i Maromak  
 oin,  
 nodi tula sala bei-beik baa itakaan mamaluk  
 makfiar sia.  
 Oras ne'e, nia kona soe sai nosi lale'an ti'an.  
 Oras ne'e, Na'i Maromak oras to'o ti'an, atu  
 sori ema raiklaran.  
 Oras ne'e, Na'i Maromak kaer ukun ti'an nodi  
 beran boot.  
 Nia moos foti Kristus ti'an,  
 Ema nia mak Nia boi kedan atu dadi  
 Na'in bodik ema klubun hotu-hotu.☆  
 11 Itakaan mamaluk sia natoba nola samea inan  
 nia mak uluk tula sala baa sia,  
 tan Bibi Malae Oan raan nakduar ti'an, bodik  
 kasu siakaan salah.  
 Sia moos natoba nola nia,  
 tan sia naberan aan keke lema Na'i Maro-  
 mak Manfatin.  
 Masik ema krakat atu no'o sia moos,  
 sia la nata'uk.  
 12 Tan lia nia, emi hotu-hotu iha lale'an musti  
 neon di'ak!  
 Mais emi hotu-hotu iha raiklaran musti neon  
 susar, tan dinu atu kona emi.  
 Diabu ulun tuun mai baa emi ti'an.  
 Nia krakat basuk,  
 tan nia natene na'ak, niakaan oras nalo aat  
 atu mohu ona!”

*Samea inan buka fetu nia iha raiklaran*

13 Baa oras nia, samea inan nia natene na'ak,  
 nia kona soe baa raiklaran ti'an. Hotu, nia baa  
 buka fetu mak nahoris Oan nia, atu nasusar nia.

14 Mais fetu nia netan liras rua, hanesan kikit  
 liras, nebee semo baa nakfunin iha fatin fuik

☆ 12:10 Ayub 1:9-11; Sakarias 3:1

mak dook nosi samea nia. Iha nia, ema naliku feto nia, to'o tinan tolu no balun.\*

<sup>15</sup> Titu-naree nunia, samea krakat, hotu nakbuut sai wee hanesan motasa'e, atu lulun nodi feto nia.

<sup>16</sup> Mais raiklaran tulun feto nia. Rai nakloke, nodi folan mohu wee mak sai nosi samea nunun, nebee wee keta to'o feto nia.

<sup>17</sup> Hotu, samea krakat basuk baa feto nia. Nia sai atu baa natuda sakar feto niakaan oan seluk sia. Sia ne'e, ema mak tuir Na'i Maromak ukun, nodi keke lema nohuun Na'i Yesus Manfatin Di'ak.

<sup>18</sup> Nunia hotu, samea nia baa nariik iha tasi tehen, nodi ruun ne'an.

## 13

### *Buat krakat aat ida sai nosi tasi*

<sup>1</sup> Nunia hotu, ha'u ktitu-karee buat krakat aat ida sai nosi tasi. Nia noo ulun hitu, dikur sanulu. Nia ta'u sabeo na'in baa dikur ida-idak. Ulun sia noo hakerek mak nahaat Na'i Maromak.✧

<sup>2</sup> Isin, hanesan busa fuik boot. Ain, hanesan asu fuik ain. Nunun, hanesan busa fuik boot nunun. Samea inan laten beran baa buat krakat aat nia, atu tuur baa kadera ukun nodi nala'ok niakaan ukun hotu-hotu.✧

<sup>3</sup> Iha buat nia ulun ida, noo kanek fitar boot, ahan kona taa to'o kre'is mate, mais la mate falik. Naree buat nia, ema hotu-hotu iha raiklaran blaar. Hotu, sia moos tuir nia.

<sup>4</sup> Sia nakneter nodi foti-nahaas samea inan nia, hanesan Maromak, tan nia laten beran baa

---

\* **12:14** Daniel 7:25, 12:7. ✧ **13:1** Daniel 7:3; Lia Raiklaran Falu Fila 17:3,7-12 ✧ **13:2** Daniel 7:4-6

buat nia ti'an. Sia moos tonu-naboot buat nia na'ak, "Nia, maka'as basuk! La noo ida mak bele natoba nola nia!"

<sup>5</sup> Tuir loos, Na'i Maromak nabusik buat krakat aat nia dale naksa'ek aan nodi nahaat Maromak naran. Buat nia netan leet atu kaer ukun, to'o fulan haat nulu resin rua laran.

<sup>6</sup> Nia dale nahaat Na'i Maromak no Na'i Maromak eman sia hotu-hotu iha lale'an.✧

<sup>7</sup> Na'i Maromak moos nabusik buat krakat aat nia atu natuda sakar Niakaan ema sia, to'o natoba nola sia. Hodi nunia, buat nia netan beran atu ukun baa ema nosi klubun hotu-hotu, ema nosi hunun hotu-hotu, no ema mak dale nodi lia hotu-hotu nosi rai hotu-hotu.✧

<sup>8</sup> Tan baa nia, ema hotu-hotu iha raiklaran sudur baa buat krakat aat nia. Ne'e mak, ema hotu-hotu mak naran la iha Bibi Malae Oan Hakerek. Uluk, ema no'o Bibi Malae Oan nia, mais Na'i Maromak nalo moris nikar. Baa oras Na'i Maromak la nase'i raiklaran dauk, Nia nakerek kedan ema makfiar hotu-hotu naran iha hakerek nia na'ak, sia mak atu moris no Nia to'o nima-nimak.✧

<sup>9</sup> "Hanono di'a-di'ak!

<sup>10</sup> Kalo Na'i Maromak nakotu ti'an na'ak, ema ida musti kona koha,  
ema nia nanis kona koha.

Kalo Na'i Maromak nakotu ti'an na'ak, ema ida kona ho'o hodi surik,  
ema nia nanis kona ho'o hodi surik."

Tan baa nia, Na'i Maromak eman sia musti naterus aan iha susar laran, hodi fiar bei-beik baa Nia.✧

---

✧ **13:6** Daniel 7:8,25, 11:36    ✧ **13:7** Daniel 7:21    ✧ **13:8** Kananuk Sia 69:29    ✧ **13:10** Yeremia 15:2, 43:11

*Buat krakat aat nomer rua sai nosi rai*

<sup>11</sup> Nunia hotu, ha'u ktitu-karee buat krakat aat ida tenik. Nia sai mai nosi rai. Nia noo dikur rua, hanesan bibi malae dikur. Lian, hanesan samea inan lian.

<sup>12</sup> Nia dadi mako'an baa buat krakat aat nomer ida mak kona taa kre'is mate nia. Hotu, niakaan ulun naruka nia nebee seten ema hotu-hotu iha raiklaran, atu sudur baa ulun nia.

<sup>13</sup> Buat krakat aat nomer rua nia nalo tadak blaar maka'as sia, to'o bele natuun ha'i nosi lale'an iha ema lear oin.

<sup>14</sup> Hodi nunia, nia nodi ulun beran tolek nola ema iha raiklaran. Nia moos naruka ema atu nalo ai'oik ida, hanesan niakaan ulun oin, nebee sia nakneter ulun mak uluk kona taa kre'is mate nia.

<sup>15</sup> Na'i Maromak nabusik buat krakat aat nomer rua nia, atu foo nawan baa ai'oik nia, nalo moris. Hodi nunia, ai'oik nia bele dale. Hotu ai'oik nia naruka ho'o kedan ema hotu-hotu mak la no'uk sudur baa nia.

<sup>16</sup> Buat krakat aat nia moos seten ema hotu-hotu atu netan marak baa liman kwana, lale netan baa baboton. Ema ki'ik-boot, soi-mukit, na'in-ata, hotu-hotu musti netan marak nia.

<sup>17</sup> Kalo lale, sia la bele fa'an sa-saa, la bele sosa sa-saa. Marak nia no hakerek buat krakat aat nomer ida naran no niakaan nomer.

<sup>18</sup> Ema musti tetu di'a-di'ak lia ne'e. Nomer nia, "666" (atus neen neen nulu resin neen). Nomer nia, kona baa ema raiklaran ida naran. See mak matenek, katak kokon nomer ne'e na'ak saa.\*

---

\* **13:18** Tuir ema matenek lia Hakerek Moon, ema filak nomer neen ne'e, nomer kasalak aat.

# 14

*Bibi Malae Oan no Niakaan ema na'in rihun atus ida haat nulu resin haat (144.000)*

<sup>1</sup> Nunia hotu, ha'u kfoti oin. Sarebak ha'u ktitu-karee Bibi Malae Oan nia no'i nariik iha foho ki'ik ida leten. Foho nia naran Foho Sion. Nia nariik namutuk no ema na'in rihun atus ida haat nulu resin haat. Iha ida-idak baboton, noo hakerek Bibi Malae Oan no Aman naran.✧

<sup>2</sup> Hotu, ha'u krona kola lia maliak ida nosi lale'an. Lia maliak nia, boot nu'u wee tatolik no maka'as hanesan kokur. Lia maliak nia moos furak, hanesan ema lear kudas bareka.

<sup>3</sup> Ema na'in rihun atus ida haat nulu resin haat nia no'i nariik se'i oin baa Na'i Maromak. Sia moos se'i oin baa fukun sia no buat horis kasalak matan haat mak satan nola Na'i Maromak habesi aan fatin. Ema lear nia nananu kananuk foun ida. Sia mesan dei mak bele nananu kananuk nia, ema seluk la bele. Sia nia mak di'a-di'ak ti'an no Na'i Maromak, tan Nia nodi Niakaan Oan raan, selu kotu siakaan salan.

<sup>4</sup> Sia moris moon, hanesan ema klalon mak sei la dala ida dauk nalo lia kfo'er. Sia tuir Bibi Malae Oan nia baa nabee dei, tan Na'i Maromak selu nola sia ti'an nodi Oan raan, nebee sia dadi baa Niakaan eman. Sia moos hanesan to'os isin fohon, mak ema nodi atu sera baa Na'i Maromak no Bibi Malae Oan.

<sup>5</sup> Siakaan ibun la natene naktolek, tan sia neon moos.✧

*Makbukar lale'an na'in tolu nodi lia*

<sup>6</sup> Hotu, ha'u ktitu-karee makbukar lale'an na'in ida tenik. Nia semo aas iha kalo'an, nodi

---

✧ 14:1 Yeskiel 9:4; Lia Raiklaran Falu Fila 7:3 ✧ 14:5 Sefanya 3:13



keke Na'i Maromak Manfatin Di'ak mak nafati nohuun. Nia semo satan nola raiklaran, katak baa ema hotu-hotu iha raiklaran. Ne'e mak, ema nosi klubun hotu-hotu, ema nosi hunun hotu-hotu, no ema mak dale nodi lia hotu-hotu nosi rai hotu-hotu.

<sup>7</sup> Nia nahii maka'as na'ak,  
 “Emi musti hakneter Na'i Maromak!  
 Emi musti foti-hahaas Niakaan naran!  
 Tan Na'i Maromak oras to'o ti'an,  
 atu leno ema hotu-hotu hahalok.  
 Tonu-haboot Nia!  
 Foti-hahaas Niakaan naran!  
 Tan Nia mak nase'i lale'an no raiklaran.  
 Nia mak naruka tasi no wee matan hotu-hotu dadi.”

<sup>8</sup> Makbukar lale'an dale notu nunia, ha'u moos titu-karee makbukar lale'an ida seluk. Nia mai tuir makbukar ohin nia. Nia katak na'ak, “Dodok ti'an! Kota Babel dodok ti'an! Kota boot nia welon ti'an! Kota aat nia nakro'on weer to'o rai ti'an. Uluk, kota nia hanesan feto dalan aat mak seten ema klubun hotu-hotu iha raiklaran, nebee sia nemu lanu no nia, no tuir nalo lia kfo'er no nia. Oras ne'e, kota nia kona Na'i Maromak hahibun ti'an!”<sup>☆</sup>

<sup>9</sup> Hotu, ha'u ktitu-karee makbukar lale'an ida seluk tenik. Nia mai tuir makbukar nomer rua nia. Nia nahii maka'as na'ak, “Sintidu! Ema hotu-hotu mak lo'u-sudur baa buat krakat aat nia no niakaan ai'oik, nanis simu Na'i Maromak hahibun! Nunia moos, ema mak simu buat nia niakaan marak iha siakaan baboton no liman.

<sup>10</sup> Na'i Maromak du'uk atu fakar tuun hahibun, hanesan naroo naseten sia nodi tua ulun.

<sup>☆</sup> 14:8 Yesaya 21:9; Yeremia 51:8; Lia Raiklaran Falu Fila 18:2

Nia atu soe lerek sia baa ha'i fatuk lobot mak laka la mohu. Niakaan makbukar lale'an no Bibi Malae Oan atu nobun siakaan susar nia.\*

<sup>11</sup> Ha'i dubun moos atu nakfolo sa'e la nakotu nosi siakaan fatin susar nia. Hodi nunia, sia netan susar mak la nakotu.”\*

<sup>12</sup> Tan baa nia, Na'i Maromak eman sia musti nanono di'a-di'ak Niakaan ukun, no fiar bei-beik baa Yesus. Keta nakiduk.

<sup>13</sup> Nunia hotu, ha'u krona kola lia maliak ida nosi lale'an. Lia nia katak baa ha'u na'ak, “Yohanis! O musti makerek nune'e: Nahuu baa oras ne'e, kalo ema fiar nohuun baa Na'i Yesus to'o mate, sia netan sotir.”

Hotu, Maromak Kmalar Lulik nataa na'ak, “Tebes! Sia atu sotir tebes! Masik sia netan susar iha raiklaran moos, sia naterus aan tuir Na'i Maromak nohuun. Tan lia nia, Na'i Maromak atu selu siakaan kolen. Hotu sia la susar tenik iha lale'an.”

*Na'i Maromak nahibu ema raiklaran hanesan ema nodi taha, lere to'os isin*

<sup>14</sup> Nunia hotu, ha'u kfoti oin. Sarebak, ha'u ktitu-karee kalo'an mutin fu'ak ida naksinak. Ema ida tuur iha kalo'an nia fohon. Ema nia, hanesan Ema Raiklaran Isin. Nia tau sabeo halo hosi mean, nodi kaer taha ro'at ida.\*

<sup>15</sup> Hotu, ha'u ktitu-karee tenik makbukar lale'an ida seluk. Nia sai nosi Na'i Maromak Niakaan Uma Hamulak nodi nahii baa ema iha kalo'an fohon nia na'ak, “Modi okaan taha nia, lere ona! Oras libur rai isin to'o ti'an.”\*

<sup>16</sup> Hotu, ema mak tuur iha kalo'an nia, bakut Niakaan taha, nodi lere no libur nola rai isin sia.

\* 14:10 Yesaya 51:17; Lia Uluk Fohon 19:24; Yeskiel 38:22

\* 14:11 Yesaya 34:10 \* 14:14 Daniel 7:13 \* 14:15 Yoel 3:13

17 Hotu, makbukar lale'an ida seluk tenik sai nosi Uma Hamulak iha lale'an. Nia kaer taha ro'at ida atu nodi tesi ai fuan iha raiklaran.

18 Hotu, makbukar lale'an ida seluk mai nosi tunu ai morin fatin iha Uma Hamulak iha lale'an. Niakaan serwisu, daka ha'i iha tunu ai morin fatin nia. Nia nahii nodi naruka mak kaer taha nia na'ak, "Modi okaan taha nia, baa tesi mola ai fuan iha rai ona! Ai anggor fuan sia tasak ti'an."

19 Hotu, makbukar lale'an nia bakut taha nia baa rai, nodi tesi nola anggor saren sia. Hotu, natama anggor fuan nia sia baa kuak laledun laran. Hotu, sama nasai ween. Sama anggor fuan nia, lia hatetek na'ak, Na'i Maromak hahibun.

20 Kuak laledun nia iha kota luan. Anggor fuan ween sai nia, hanesan raan suli sai nosi ema mak Na'i Maromak nahibu. Siakaan raan nia suli sai wa'in to'o dadi mota ida. Mota nia naruk, kilo atus tolu. Le'an, ro'a ida no balun.\* ✧

## 15

### *Yohanis naree lale'an isin*

1 Hotu, ha'u ktitu-karee lia kasalak ida iha lale'an mak nalo ha'u kblaar tebes. Noo makbukar lale'an hitu. Ida-idak kaer beran atu solok dinu baa raiklaran. Dinu hitu nia, dinu ikus. Kalo dinu nia sia dadi ti'an, lia nia na'ak Na'i Maromak laran malirin ti'an. Nia la nahibu ema raiklaran ona.

---

\* **14:20** Hakerek Moon lia Yunani na'ak mota nia naruk "1.600 stadia", ne'e tama kilo atus tolu. Mota nia le'an, "manesak no kuda fare'u". Ne'e, ro'a ida no balun, tan siakaan kuda, boot liu kuda iha rai Timor. ✧ **14:20** Yesaya 63:3; Kananuk Susar 1:15; Lia Raiklaran Falu Fila 19:15

<sup>2</sup> Hotu, ha'u ktitu-karee tasi mak laka nu'u lalenok kahur ha'i. Ha'u moos titu-karee ema lear nariik iha tasi nia tehen. Sia nia mak la tuir buat krakat aat nia, no la lo'u-sudur baa niakaan ai'oik, no la simu niakaan marak. Sia hotu-hotu kaer bareka mak sia simu nosi Na'i Maromak.

<sup>3</sup> Hotu, sia nananu kananuk ida. Uluk Na'i Maromak ain-liman Musa nananu kananuk nia, baa oras Na'i Maromak nodi Niakaan ema sia sai nosi susar iha rai Mesir. Ema nia sia moos nananu kananuk ida tenik nodi tonu-naboot Na'i Yesus. Uluk, ema no'o Nia, nu'u ema sera bibi malae oan iha Uma Hamulak nodi natetu baa Na'i Maromak atu nalirin Niakaan laran. Sia nananu na'ak,

“Aaa, Ama Maromak!

Ami tonu-haboot Ita Boot!

Ami foti-hahaas Ita Boot!

Tan Ita Boot beran kaliuk.

No Ita Boot maka'as kaliuk.

Ita Boot mak kaer ukun baa ema klubun hotu-hotu.

Ita Boot mak Na'in bodik ema hunun hotu-hotu.

Ita Boot hahalok, kasalak kaliuk.

Ita Boot serwisu, kabaas tebes.

Ita Boot dalan, loos tebes.

Ita Boot moris, moon kaliuk.✧

<sup>4</sup> Ema hotu-hotu foti-nahaas Ita Boot naran.

Ema hotu-hotu tonu-naboot Ita Boot dadi'ak.

Tan Ita Boot mesan mak moon.

No Ita Boot mesan mak la noo sala.

Ema klubun hotu-hotu atu mai lo'u-sudur baa Ita Boot.

Ema hunun hotu-hotu atu mai sera dodan baa Ita Boot.

---

✧ 15:3 Ema Isra'el Sai Nosi Mesir 15:1-18

Tan ema hotu-hotu naree ti'an Ita Boot hahalok di'ak.

No ema hotu-hotu natene ti'an Ita Boot laran loos."✧

<sup>5</sup> Ema nia sia nananu notu, ha'u ktitu-karee Ke'an Lulik iha Uma Hamulak iha lale'an. Tais odamatan ke'an nia, nakloke.✧

<sup>6</sup> Ha'u moos karee makbukar lale'an na'in hitu mak nodi dinu hitu nia. Sia la'o sai nosi Uma Hamulak. Sia tau faru mutin moos mak naksinak, nodi sakat tais hasaan mak soru hosi mean isin.

<sup>7</sup> Hotu, ha'u ktitu-karee buat horis kasalak matan ida nosi buat horis kasalak matan haat mak nariik satan nola Na'i Maromak habesi aan fatin nia. Buat nia fa'e hanek mean hitu, foo baa makbukar lale'an na'in hitu nia. Hanek hitu nia, ida-idak nahisi kastikar nosi Na'i Maromak mak moris hori nima-nimak to'o nima-nimak, tan Na'i Maromak nadi'a aan ti'an, atu fakar hahibun baa raiklaran.

<sup>8</sup> La kleur, Uma Hamulak nakonu dubun mak tubu nosi Na'i Maromak Niakaan maka'as no Niakaan kabaas, to'o la noo ema ida kois mak bele tama baa Uma Hamulak nia. Makbukar lale'an na'in hitu nia musti fakar mohu dinu hitu nia baa raiklaran lai, foin ema bele tama baa.✧

## 16

### *Na'i Maromak fakar hahibun baa raiklaran*

<sup>1</sup> Nunia hotu, ha'u krona kola lia maliak maka'as ida sai nosi Uma Hamulak. Lia nia

---

✧ 15:4 Yeremia 10:7; Kananuk Sia 86:9 ✧ 15:5 Ema Isra'el Sai Nosi Mesir 38:21 ✧ 15:8 Ema Isra'el Sai Nosi Mesir 40:34; 1 Na'i Isra'el Sia 8:10-11; 2 Lia Rai Isra'el no Rai Yahuda 5:13-14; Yesaya 6:4

naruka makbukar lale'an na'in hitu nia na'ak,  
 “Baa ona! Foti modi hanek nia sia baa! Fakar  
 matuun Na'i Maromak hahibun baa raiklaran  
 ona.”

<sup>2</sup> Rona nola nunia, makbukar lale'an nomer  
 ida fakar niakaan hanek isin baa raiklaran.  
 Sarebak, dinu kona ema hotu-hotu mak simu  
 buat krakat aat nia niakaan marak, no ema mak  
 lo'u-sudur baa niakaan ai'oik. Sia kona mirik aat  
 mak moras tebes.✧

<sup>3</sup> Hotu, makbukar lale'an nomer rua fakar  
 niakaan hanek isin baa tasi. Sarebak, wee tasi  
 dadi raa dois, nu'u ema maten raan. Makmoris  
 hotu-hotu iha tasi moos, mate mohu.

<sup>4</sup> Hotu, makbukar lale'an nomer tolu fakar  
 niakaan hanek isin baa mota. Wee mota hotu-  
 hotu dadi raa.✧

<sup>5</sup> Hotu, ha'u krona kola makbukar lale'an ida  
 tenik. Nia, mak babilan wee hotu-hotu iha  
 raiklaran. Nia tonu-naboot Na'i Maromak na'ak,  
 “Aaa, Ama Maromak!

Ita Boot mak moon kaliuk.

Ita Boot mak la dala ida sala.

Ita Boot moris hori nima-nimak,

no Ita Boot moos atu moris to'o nima-nimak.

Ita Boot hakotu lia hodi moon.

Ita Boot taa ukun halo makonak.

<sup>6</sup> Ema naduar ti'an

Ita Boot eman raan.

Ema no'o ti'an

Ita Boot mako'an sia.

Tan baa nia, Ita Boot seten sia nemu raa.

Tan baa nia, Ita Boot selu nikar baa sia hodi  
 kastikar.”

---

✧ **16:2** Ema Isra'el Sai Nosi Mesir 9:10    ✧ **16:4** Ema Isra'el Sai  
 Nosi Mesir 7:17-21; Kananuk Sia 78:44

<sup>7</sup> Hotu, ha'u krona kola lia maliak ida sai nosi sera fatin, nodi nataa na'ak,

“Tebes! Na'i Maromak beran kaliuk.

Tebes! Na'i Maromak maka'as kaliuk.

Na'i Maromak nakotu lian nodi moon.

Na'i Maromak taa ukun nalo makonak.”

<sup>8</sup> Hotu, makbukar lale'an nomer haat fakar niakaan hanek isin baa loro. Sarebak, loro dadi manas liu resik, to'o ema raiklaran isin namotuk.

<sup>9</sup> Hotu, sia dale nahaat Na'i Maromak naran, tan dinu nia. Masik nunia moos, la noo ema ida kois mak fila nikar baa Na'i Maromak atu tonu-naboot Niakaan naran.

<sup>10</sup> Hotu, makbukar lale'an nomer lima fakar niakaan hanek isin, baa buat krakat aat niakaan kadera ukun. Sarebak, nakukun luri taka nola ema hotu-hotu mak lo'u-sudur baa buat nia. Sia ruun ne'an, tan la bele terus susar.✧

<sup>11</sup> Sia moos dale nahaat Na'i Maromak naran iha lale'an, tan sia netan kanek mak moras tebes. Masik nunia moos, la noo ida kois mak nanawa nalo aat.

<sup>12</sup> Hotu, makbukar lale'an nomer neen fakar niakaan hanek isin baa mota boot ida, naran Efrat. Mota nia ween, moti kedas. Hotu, sia nalo baa dalan bodik na'in no sondadu mak atu mai nosi lorosa'e.✧

<sup>13</sup> Ha'u moos karee diabu na'in tolu, ilas nu'u lekat. Ida sai nosi samea inan nia nunun. Ida sai nosi buat krakat aat nia nunun. Ida tenik sai nosi samea inan mako'an tolek teen nunun.

<sup>14</sup> Diabu tolu nia kaer beran atu nalo tadak blaar oi-oik. Sia sai baa nasoru na'in hotu-hotu iha raiklaran. Hotu, sia meno nola leet ida atu baa natuda sakar Na'i Maromak mak beran

kaliuk. Mais, leet mak sia nakotu ti'an nia, kona besik baa Na'i Maromak leet mak Nia boi ti'an atu natoba Niakaan funu hotu-hotu.

<sup>15-16</sup> Fatin mak sia meno atu libur malu nodi natuda, tuir lia Ibrani fatin nia na'ak "Armagedon".

Yesus Kristus moos dale na'ak, "Hanoin di'a-di'ak! Sarebak Ha'u kmai hanesan ema na'ok, mak ema la nanoin nola. Ema mak sotir, ema mak daka nodi nadi'a niakaan faru ti'an. Nodi nunia, oras Ha'u kmai, nia la moe, tan la la'o nakwalan iha ema lear oin. Mais nadi'a aan ti'an atu simu Ha'u."✧

<sup>17</sup> Hotu, makbukar lale'an nomer hitu fakar niakaan hanek isin baa anin. Na'i Maromak moos dale nodi lian boot nosi Niakaan habesi aan fatin iha Uma Hamulak na'ak, "Hotu ti'an! Ha'ukaan hahibun nakfakar mohu ti'an."

<sup>18</sup> Hotu, mameran taba. Kokur boot moos taba tutan malu. Kakekuk boot moos mai. Kakekuk nunia sei la dala ida dauk dadi iha raiklaran ne'e.✧

<sup>19</sup> Baa oras nia, Na'i Maromak la nalu'a ema kota Babel siakaan a'aat. Nia nodi kakekuk kasalak nia, to'o kota boot nia nakfota fa'e baa tolu. Hodi nunia, ema Babel noran Niakaan hahibun. Kota seluk sia iha raiklaran moos nakro'on mohu.✧

<sup>20</sup> Baa oras nia, rai mout nunia dei. Foho moos lakon mohu.✧

<sup>21</sup> Udan fatuk bo-boot moos tuun nosi kalo'an, latan nola ema raiklaran. Udan fatuk nia sia

---

✧ **16:15-16** Mateus 24:43-44; Lukas 12:39-40; Lia Raiklaran Falu Fila 3:3; 2 Na'i Isra'el Sia 23:29; Sakarias 12:11    ✧ **16:18** Lia Raiklaran Falu Fila 8:5, 11:13, 19    ✧ **16:19** Yesaya 51:17    ✧ **16:20** Lia Raiklaran Falu Fila 6:14



todan tebes, to'o kilo haat nulu.\* Udan fatuk nia sia nasusar ema raiklaran, to'o sia dale nahaat Na'i Maromak naran.✧

## 17

*Maromak Niakaan makbukar natetek kota Babel no fetu dalan aat*

<sup>1</sup> Hotu, ida nosi makbukar lale'an na'in hitu mak kaer hanek mamuk sia, mai dale baa ha'u na'ak, "Mai ne'e lai! Atu katudu baa o Na'i Maromak lala'ok nodi kastikar fetu dalan aat nia. Ne'e na'ak, kota boot mak kre'is wee wa'in.✧

<sup>2</sup> Uluk na'in sia nosi nabee dei mai nalo lia kfo'er no nia. Ema seluk sia moos mai nemu lanu, nodi tuir nalo lia kfo'er."✧

<sup>3</sup> Hotu, ha'u kona Maromak Kmalar Lulik. Makbukar lale'an nia foti nodi ha'u baa fatin fuik ida. Iha nia, ha'u ktitu-karee fetu ida sa'e buat meak ida. Buat nia noo ulun hitu, dikur sanulu. Iha isin tomak noo hakerek lia fuan mak tolak nahaat Na'i Maromak.✧

<sup>4</sup> Fetu nia natais tais mamar mak ilas mean asuaten. Fafutar sia nosi mean, fatuk matan folin todan, no morteen. Liman kwana kaer hemu fatik halo hosi mean. Hemu fatik nia nakonu tua. Tua nia, hatetek baa fetu nia niakaan sala kfo'er no hahalok aat hotu-hotu.✧

<sup>5</sup> Iha baboton hakerek naran ida. Naran nia isin sei subar. Mais hakerek nia na'ak nune'e: HA'U NE'E, BABEL!

---

\* **16:21** Hakerek Moon lia Yunani na'ak, "udan fatuk todan *talenta* ida". *Talenta* ida todan hanesan kilo tolu nulu resin haat to'o kilo haat nulu. ✧ **16:21** Ema Isra'el Sai Nosi Mesir 9:23; Lia Raiklaran Falu Fila 11:19 ✧ **17:1** Yeremia 51:13 ✧ **17:2** Yesaya 23:17; Yeremia 51:7 ✧ **17:3** Lia Raiklaran Falu Fila 13:1 ✧ **17:4** Yeremia 51:7

HA'U NE'E, KOTA BOOT KALIUK!  
 A'AAT HOTU-HOTU IHA RAIKLARAN,  
 HUUN BAA HA'U.  
 HOTU-HOTU MAK NAKUR BITI-KLUNI IHA RAIK-  
 LARAN,  
 NAHABUT BAA HA'U.

<sup>6</sup> Hotu, ha'u ktitu-karee fetu nia lanu todan ti'an, tan nemu nola Na'i Maromak eman raan. Nia no'o Na'i Maromak eman sia, tan sia la nanawa dale lia Yesus.

Karee kola nunia, ha'u moos kakaka beik.

<sup>7</sup> Mais makbukar lale'an nia nusu ha'u na'ak, "Tan saa o makaka beik nunia? Mai ona, nebee ha'u katak baa o lia hatetek isin nosi fetu aat nia. Nunia moos lia hatetek isin nosi buat meak ulun hitu no dikur sanulu mak fetu aat sa'e nia.

<sup>8</sup> Uluk, buat meak nia moris iha raiklaran, mais oras ne'e la iha ti'an. La kleur, nia mosu nikar nosi kuak susar mak la noo nidin nia. Baa oras nia, noo ema mak moris iha raiklaran, mak naran la iha Bibi Malae Oan Hakerek. Hakerek nia, Na'i Maromak nakerek uluk ti'an, hori sei la nase'i raiklaran dauk. Baa oras ema titu-naree buat meak nia mai nikar, sia atu nakaka beik. Mais nosi ikus, Na'i Maromak atu soe lakon nia baa tasi ha'i mak laka bei-beik."☆

<sup>9</sup> Hotu, makbukar lale'an nia dale natutan na'ak, "Ema mak matenek, bele natene lia hatetek ne'e isin. Buat meak ulun hitu nia, lia isin na'ak, foho hitu. Fetu dalan aat nia tuur iha foho nia sia leten. Ulun hitu nia moos, lia isin na'ak, na'i hitu.

<sup>10</sup> Nosi na'i hitu nia, lima mate ti'an. Oras ne'e, ida sei kaer ukun. Ida tenik, sei la kaer ukun

☆ 17:8 Daniel 7:7; Lia Raiklaran Falu Fila 11:7; Kananuk Sia 69:29

dauk. Kalo niakaan oras mai ti'an, nia moos atu kaer ukun, mais la kleur falik.

<sup>11</sup> Ha'u kalore moos lia isin nosi buat meak mak uluk moris iha raiklaran, mais oras ne'e la iha ti'an. Uluk, nia moos tama na'i hitu nia. Nia atu fila mai, dadi tenik baa na'i nomer walu. Mais nia moos atu simu kastikar mak la nakotu.

<sup>12</sup> Dikur sanulu nia, lia isin na'ak, na'i sanulu. Sia sei la kaer ukun dauk. Sia atu simu beran nodi kaer ukun namutuk no buat meak nia, mais la oras dei.\* ☆

<sup>13</sup> Sia hotu-hotu ko'a namutuk lia fuan atu latan siakaan beran baa buat meak nia.

<sup>14</sup> Na'i nia sia atu baa natuda sakar Bibi Malae Oan. Mais Bibi Malae Oan no Niakaan ema sia atu natoba nola sia hotu-hotu. Ema mak tuir Bibi Malae Oan, sia mak Nia boi nola no bolu nola atu tuir Nia nohuun. Sia atu natoba nola funu, tan Bibi Malae Oan maka'as kaliuk. Nia mesan dei mak dadi Na'in baa na'i hotu-hotu, no Ulun baa ulun hotu-hotu.

<sup>15</sup> Wee wa'in mak kre'is fetu dalam aat nia, ne'e mak ema nosi klubun hotu-hotu, ema nosi hunun hotu-hotu, no ema mak dale nodi lia hotu-hotu nosi rai hotu-hotu.

<sup>16</sup> Na'i sanulu no buat meak nia hirus fetu oin ma'ar moe lalek nia. Sia atu nadau nola niakaan tais no naha sia tomak, hotu nabusik nela nia nakwalan iha nia. Hotu, sia moos naa niakaan isin. Hotu, sia soe lerek isin resin baa ha'i laran.

<sup>17</sup> Na'i Maromak du'uk mak nase'i nebee na'i sanulu nia kabuar lia fuan atu latan beran baa buat meak nia, nebee buat nia nadodok fetu nia.

---

\* **17:12** Lia fuan iha Hakerek Moon lia Yunani ne'e noo lia isin oik rua. Ida, la oras dei. Ida seluk, tuku ida dei. ☆ **17:12** Daniel 7:24

Hodi nunia, Na'i Maromak lia kakotun hotu-hotu atu dadi."

<sup>18</sup> Dale notu nunia, makbukar lale'an nia dale tu'an tenik na'ak, "Feto dalam aat mak o maree nia, ne'e mak kota boot mak ukun baa na'i hotu-hotu iha raiklaran."

## 18

### *Lia kota Babel nakro'on*

<sup>1</sup> Nunia hotu, ha'u ktitu-karee makbukar lale'an ida seluk tuun mai. Nia kaer beran maka'as, to'o naksinak nodi naroma raiklaran tomak.

<sup>2</sup> Nia katak nodi lian maliak boot na'ak, "Nakro'on ti'an! Nakro'on ti'an! Kota Babel nakro'on ti'an! Nakloti ti'an! Nakloti ti'an! Kota Boot nia nakloti ti'an!

Oras ne'e, kota nia dadi diabu moris fatin.

Oras ne'e, kota nia dadi kukun aat moris fatin.

Oras ne'e, kota nia dadi kawaa fatin.

Oras ne'e, kota nia dadi asu fuik fatin.✧

<sup>3</sup> Nia nakro'on ti'an, tan ema nosi klubun hotu-hotu iha raiklaran,

mai hei-hein nemu tua to'o lanu iha nia.

Nia nakloti ti'an, tan ema nosi hunun hotu-hotu iha raiklaran,

mai hei-hein nalo lia kfo'er iha nia.

Na'i nosi rai hotu-hotu,

mai nakur biti-kluni iha nia.

Ema maksauk nosi fatin hotu-hotu

mai naksauk to'o soi iha nia.

---

✧ **18:2** Yesaya 21:9; Yeremia 51:8; Lia Raiklaran Falu Fila 14:8; Yesaya 13:21; Yeremia 50:39

Kota nia, nu'u fetu dalam aat mak beer  
loos sosa naha kabaas dei.

Kota nia, nu'u fetu dalam aat mak buka  
loos midar dei."✧

<sup>4</sup> Nunia hotu, ha'u krona kola lia maliak ida  
seluk tenik nosi lale'an na'ak,

"Hei! Ha'ukaan ema sia!

Halai sai hosi kota nia ona!

La'o hela kota nia ona!

Keta halo tuir ema kota nia siakaan a'aat,  
nebee keta kona siakaan kastikar.✧

<sup>5</sup> Tan siakaan a'aat  
wa'in basuk ti'an.

Siakaan salan moos

butuk tetek malu to'o kalo'an ti'an.

Oras ne'e, Na'i Maromak la nalu'a

siakaan dalam moris aat nia.

Oras ne'e, Na'i Maromak nadi'a aan ti'an,

atu natuun kastikar baa sia.✧

<sup>6</sup> Musti selu nikar siakaan a'aat,  
manesak no a'aat mak sia nalo baa ema  
seluk.

Mais musti selu baa sia  
dala rua.

Uluk, sia seten ema nemu nosi siakaan hemu  
fatik halo hosi mean.

Hemu fatik nia nakonu tua mak nahoris  
dinu.

Oras ne'e sia musti nemu du'uk tua nia,  
mais musti nemu dala rua.✧

<sup>7</sup> Sia naboot aan.

Sia nahaas aan.

Sia beer loos moris kabaas dei.

Sia nakara loos midar dei.

---

✧ **18:3** Yesaya 23:17; Yeremia 51:7 ✧ **18:4** Yesaya 48:20; Yeremia  
50:8, 51:6, 45 ✧ **18:5** Lia Uluk Fohon 18:20-21; Yeremia 51:9

✧ **18:6** Kananuk Sia 137:8; Yeremia 50:29

Tan lia nia, sia musti moris susar.

Sia musti neon susar.

Uluk, sia dale loko aan nu'u feto dalam aat na'ak,

'Ha'u ne'e, Ina Na'i!

Ha'u la kdadi feto faluk kois!

Ha'u la ktanis karo'an aan kois.

Ha'u la ktau hene metan kois.'

<sup>8</sup> Sia dale nunia to'o Na'i Maromak nahibu ti'an.

Oras ne'e Na'i Maromak atu kastikar sia ona.

Iha loron ida laran dei,

sia atu noran salaen tebes,

sia atu tanis naro'an aan tebes.

Sia mate dodok,

to'o ema foti soe sia baa ha'i,

to'o ema tunu siakaan maten.

Na'i Maromak beran kaliuk, mak natuun kastikar ne'e.

Na'i Maromak boot kaliuk, mak nakotu lia ne'e.✧

<sup>9</sup> Uluk, na'i sia mai hei-hein

nalo lia kfo'er iha kota nia,

nodi moris furak iha nia.

Mais oras ne'e sia atu nobun ha'i dubun sai,

foin sia natene na'ak kota nia namotu karin ti'an.

Hotu, sia tanis naro'an aan tan kota nia.

<sup>10</sup> Sia nata'uk naree ema kota nia siakaan susar.

Mais sia nariik loos nosi dook dei.

Sia nobun loos nosi nebaa dei.

Hotu, sia dale na'ak,

'Adeei! Babel mak hadomi!

Adeei! Kota mak hadomi!

Tuku ida laran dei, o kona kastikar ti'an.

Laku matan dei, o kona dinu ti'an.'✧

<sup>11</sup> Rona nola nunia, ema fatin hotu-hotu mak

uluk mai naksauk iha kota nia,

sia moos tuir tanis naro'an aan,

tan la noo ema ida kois iha kota nia,  
mak atu sosa tenik siakaan naha ona.✧

12 La noo ema ida mak atu sosa tenik  
siakaan fafutar nosi mean no mutin,  
nosi fatuk mahoo matan no morteen.

La noo ema ida mak atu sosa tenik  
siakaan tais mamar,  
no tais kabaas seluk sia.

La noo ema ida mak atu sosa tenik  
siakaan naha nosi ai morin, dikur ba'at,  
no ai ba'at seluk sia.

La noo ema ida mak atu sosa tenik  
siakaan naha nosi besi, besi riti, no fatuk  
marmar.

13 La noo ema ida mak atu sosa tenik  
siakaan hae na'an, lisa, no babudun  
seluk sia.

La noo ema ida mak atu sosa tenik  
siakaan ai ween morin no mina morin  
oi-oik.

La noo ema ida mak atu sosa tenik  
siakaan tua, mina saitun,  
tubi rahun, no hare gandum.

La noo ema ida mak atu sosa tenik  
siakaan karau, bibi malae, no kuda.

La noo ema ida mak atu sosa tenik  
siakaan karobak naha,  
no siakaan ata.✧

14 Ema maksauk sia atu sadi'a na'ak,  
'Adeei, Babel!

Adeei, kota boot!

Naha kabaas sia mak okaan ema sia  
beer kaliuk,

la noo ti'an.

Hotu-hotu lakon ona.

- Ema sia mukit karin ti'an to'o taka karas  
 baa rai.'
- 15 Uluk, ema maksauk sia soi, tan feto dalam aat  
 nia.  
 Mais oras ne'e, siakaan neon moras la mo-  
 mohu.  
 Sia nata'uk,  
 naree ema kota nia siakaan susar.  
 Sia kiki,  
 naree ema kota nia siakaan kastikar.  
 Mais sia nobun loos nosi dook dei.  
 Sia nariik loos nosi nebaa dei.
- 16 Hotu, sia dale na'ak,  
 'Adeei! Kota Babel susar!  
 Adeei! Kota boot susar!✧  
 Uluk, okaan ema natais tais mamar  
 nosi tais folin todan kaliuk.  
 Uluk, sia tau fafutar nosi mean, morteen,  
 no fatuk mak folin todan kaliuk.
- 17 Mais tuku ida laran dei,  
 naha sia mohu ti'an.  
 Laku matan dei,  
 sasoin sia lakon ti'an!'
- Uluk, roo ulun sia no makserwisu sia  
 baa-mai bele-bele nosi kota nia.  
 Mais oras ne'e, sia nobun loos nosi dook dei.  
 Mais oras ne'e, sia titu loos nosi nebaa dei.✧
- 18 Sia nobun dubun sai nosi ha'i.  
 Hotu, sia natene nola na'ak kota nia namo-  
 tuk mohu ti'an.  
 Sia moos dale na'ak,  
 'Adeei, susar! La noo kota seluk  
 mak atu boot nu'u Babel tenik.  
 Adeei, susar! La noo kota seluk  
 mak atu kabaas manesak no nia tenik.'✧

---

✧ 18:16 Yeskiel 27:31, 36 ✧ 18:17 Yesaya 23:14; Yeskiel 27:26-30

✧ 18:18 Yeskiel 27:32



19 Hotu, sia ra'ut ahukresan tau baa ulun,  
 tan sia neon susar.  
 Sia tanis naro'an aan,  
 tan sia neon dodok.

Hotu, sia dale na'ak,  
 'Adeei! Kota Babel susar!  
 Adeei! Kota boot susar!  
 Ami baa-mai hodi naha baa o,  
 to'o ami moos soi.  
 Ami hatiu hodi okaan naha,  
 to'o ami moos moris furak.  
 Mais tuku ida laran dei,  
 hotu-hotu lakon mohu.  
 Mais, laku matan dei,  
 hotu-hotu dodok mohu.'✧

20 Hotu, ha'u krona kola lia maliak boot ida  
 dale nune'e:

'Hei, emi mak moris iha lale'an!  
 Emi lalika neon ki'ik tenik ona.  
 Hei, emi mak dadi Na'i Maromak eman sia,  
 emi lalika neon susar tenik ona.  
 Emi, mak dadi Na'i Maromak klosan sia,  
 neon boot baa ona.  
 Emi, mak dadi Maromak mako'an sia,  
 neon di'ak baa ona.  
 Uluk, ema Babel nasusar emi.  
 Uluk, ema kota nia naloot emi.  
 Mais oras ne'e, Na'i Maromak selu emikaan  
 susar nia ti'an.  
 Oras ne'e, Nia selu nikar kota nia niakaan  
 a'aat ti'an.'''✧

21 Dale hotu nunia, ha'u karee tenik makbukar  
 lale'an biit ida. Nia mai kaer nola fatuk ida, boot  
 nu'u ema. Hotu le'ak natama baa tasi. Nia moos  
 katak na'ak,

✧ 18:19 Yeskiel 27:30-34

✧ 18:20 Hanoin Hikar Dalam Moris

32:43; Yeremia 51:48

“Na'i Maromak atu le'ak lerek kota Babel nunia.  
Na'i Maromak atu nalakon kota boot nia  
nunia.✧

22 La noo ema ida kois,  
mak nananu nadahur tenik iha kota nia.

La noo ema ida kois,  
mak rona tenik bareka,  
no kfui lian iha kota nia.

La noo ema ida kois,  
mak loke tenik uma fa'an naha iha kota nia.

La noo ema ida kois,  
mak ledu tenik hare iha kota nia.✧

23 La noo ema ida kois,  
mak sunu tenik badut iha kota nia.

La noo ema ida kois,  
mak nalo tenik dahur hola malu iha kota nia.

Uluk, ema maksauk nosi Babel nia,  
soi ti'an.

Uluk, ema makfa'an nosi kota nia,  
moris furak ti'an.

Mais sia tau matenek kukun,  
nodi be'ur ema nosi klubun hotu-hotu iha  
raiklaran.

Sia tau matenek hakneko,  
nodi tolek ema nosi hunun hotu-hotu iha  
raiklaran.✧

24 Babel netan kastikar todan nia,  
tan no'o hei-hein Maromak mako'an sia.

Kota boot nia dodok ti'an,  
tan naloot hei-hein Na'i Maromak eman sia.

Na'i Maromak eman sia moos kona ho'o iha fatin  
seluk sia.

Mais, Babel mak musti natiu sala nia sia  
hotu-hotu.

---

✧ **18:21** Yeremia 51:63-64; Yeskiel 26:21 ✧ **18:22** Yeskiel 26:13;  
Yesaya 24:8 ✧ **18:23** Yeremia 7:34, 25:10

Kota boot nia mak musti nataa nola hotu-hotu.”✧

## 19

### *Klibur boot nananu iha lale'an*

<sup>1</sup> Makbukar lale'an nia dale notu nunia, ha'u moos rona kola lia maliak boot, hanesan klibur boot no'i nananu iha lale'an. Sia nananu na'ak, “Aleluya! Aleluya!

Ami tonu amikaan Maromak, tan Nia mak boot kaliuk.

Aleluya! Aleluya!

Na'i Maromak mak sori ami nosi amikaan salan.

Na'i Maromak mak nahulin ami nosi amikaan a'aat.

<sup>2</sup> Ami tonu amikaan Maromak, tan Nia mak nakotu lia nodi moon.

Ami tonu amikaan Maromak, tan Nia taa ukun nalo makonak.

Na'i Maromak taa ukun baa fetu dalan aat nia, tan nia seten ema iha raiklaran, atu tuir niakaan a'aat.

Na'i Maromak selu nikar baa fetu aat nia, tan nia no'o hei-hein

Na'i Maromak Niakaan ema sia.”✧

<sup>3</sup> Hotu, sia nananu tenik kananuk ida seluk na'ak,

“Aleluya! Tonu-haboot Na'i Maromak!

Aleluya! Foti-hahaas Niakaan naran!

Tan dubun nosi ha'i mak namotu fetu nia maten,

sa'e bei-beik la nanawa.

Tan dubun nosi ha'i mak sunu kota boot nia,

✧ 18:24 Yeremia 51:49 ✧ 19:2 Hanoin Hikar Dalan Moris 32:43;

2 Na'i Isra'el Sia 9:7

sa'e bei-beik la nakotu."✧

<sup>4</sup> Nunia hotu, katuas na'in rua nulu resin haat no buat horis kasalak matan haat nia, nakni'a lo'u-sudur se'i oin baa Na'i Maromak habesi aan fatin. Sia nakneter Nia nodi dale na'ak,  
 "Tebes! Mai ita tonu-haboot Na'i Maromak!  
 Aleluya! Mai ita foti-hahaas Niakaan naran!"

*Dahur bodik Bibi Malae Oan no sasudin iha lale'an*

<sup>5</sup> Hotu, ha'u krona kola lia maliak ida tenik mai nosi habesi aan fatin nia na'ak,  
 "Hei, Maromak ain-liman hotu-hotu!  
 Hei, Maromak eman hotu-hotu!  
 Mai foti-hahaas Niakaan naran.

Ki'ik-boot, matas-lawarik, mai tonu Nia."✧

<sup>6</sup> Hotu, ha'u krona kola hanesan ema lear dale baa malu. Siakaan lian, maliak boot hanesan wee tatolik, no maka'as hanesan kokur. Sia dale na'ak,

"Aleluya! Ami tonu-haboot Na'i Maromak.

Aleluya! Ami foti-hahaas Niakaan naran.

Nia mak beran kaliuk.

Nia mak ukun hotu-hotu.✧

<sup>7</sup> Oras ne'e, itakaan neon di'ak ti'an.

Oras ne'e, itakaan neon boot ti'an.

Ita tonu-haboot Nia.

Tan dahur bodik Bibi Malae Oan to'o ti'an.

Ita foti-hahaas Niakaan naran.

Tan Bibi Malae Oan sasudin feto nadi'a aan ti'an.

<sup>8</sup> Na'i Maromak natais tais mamar baa sasudin nia.

Na'i Maromak natais tais mutin molen baa sasudin nia."

---

✧ 19:3 Yesaya 34:10 ✧ 19:5 Kananuk Sia 115:13 ✧ 19:6 Yeskiel 1:24; Kananuk Sia 93:1, 97:1, 99:1

(Tais mutin molen mak Na'i Maromak natais sasudin feto nia, ne'e mak, Niakaan ema siakaan hahalok di'ak.)

<sup>9</sup> Hotu, makbukar lale'an nia moos katak baa ha'u na'ak, "Yohanis! O musti makerek nune'e: 'Na'i Maromak atu nalo dahur bodik Bibi Malae Oan no Niakaan sasudin. Ema hotu-hotu mak kona hamata, sotir tebes!'"

Hotu, makbukar nia dale natutan tenik na'ak, "Na'i Maromak Manfatin ne'e, tebes no loos!"<sup>✧</sup>

<sup>10</sup> Ha'u moos kakni'a atu klo'u-sudur baa makbukar lale'an nia. Mais nia de'an ha'u na'ak, "O keta malo nunia! Tan ha'u moos Maromak atan hanesan o mo okaan mamaluk sia mak keke lema Yesus hanorin. Yesus hanorin nia, manesak no hanorin mak uluk Maromak foo baa Niakaan mako'an sia. Tan baa nia, keta lo'u-sudur baa ha'u. Lo'u-sudur baa Na'i Maromak dei!"

*Na'i Yesus mai sa'e kuda mutik*

<sup>11</sup> Hotu, ha'u kfoti oin, ha'u ktitu-karee lale'an nakloke. Sarebak, karee kuda mutik matan ida nariik iha nia. Noo ema ida sa'e kuda nia. Ema nia naran, "Ema Mak Kaer Metin Mamenon" no "Ema Mak Tebes no Loos". Ema nia, oras nakotu lia, nia nakotu nalo loos. Oras baa natuda, nia baa nodi neon moon.<sup>✧</sup>

<sup>12</sup> Matan laka nu'u ha'i. Tau sabeo na'in lear iha ulun. Naran hakerek iha isin, mais nia na'in du'uk mak natene naran nia isin.<sup>✧</sup>

<sup>13</sup> Niakaan tais, loban baa raa ti'an. Ema temi Nia na'ak, "Maromak Manfatin".

<sup>14</sup> Hotu, ha'u karee sondadu lale'an sia sa'e kuda mutik atu tuir Nia. Sondadu sia hotu-hotu moos tau tais mamar mutin molen.

✧ 19:9 Mateus 22:2-3 ✧ 19:11 Yeskiel 1:1; Kananuk Sia 96:13; Yesaya 11:4 ✧ 19:12 Daniel 10:6

15 Surik ro'at ida naklosu sai nosi ema nia ibun. Nia nodi surik nia, baa natuda sakar ema klubun hotu-hotu iha raiklaran, to'o natoba nola sia. Hotu nia atu ukun sia nodi meik no ro'at, to'o sia moos noran hahibun nosi Na'i Maromak mak beran kaliuk. Na'i Maromak hahibun nia, hatetek baa lia ema sama hei-hein anggor fuan atu nasai ween.✧

16 Iha Ema nia tais no kelen, noo hakerek nune'e:

Na'in baa na'i hotu-hotu,  
Ulun baa ulun hotu-hotu.

*Yesus natoba nola buat krakat aat no niakaan maktuir sia*

17 Hotu, ha'u ktitu-karee makbukar lale'an ida nariik iha loro matan leten. Nia bolu kawaa hotu-hotu mak semo iha lale'an na'ak, "Mai libur malu hotu-hotu iha ne'e ona! Mai haa Na'i Maromak dahur boot!

18 Mai haa ema maten na'an! Haa na'in no meo ulun na'an. Haa sondadu na'an. Haa kuda no maksa'e kuda na'an. Haa ema ki'ik-boot na'an. Haa ata no ulun na'an. Badak dei, mai haa ema maten hotu-hotu na'an."✧

19 Hotu, ha'u ktitu-karee buat krakat aat mak uluk sai nosi tasi nia. Buat nia kabuar lia no na'i hotu-hotu iha raiklaran. Hotu, sia no siakaan sondadu sia baa natuda sakar ema maksa'e kuda mutik nia, no niakaan sondadu lale'an sia.

20 Mais, ema maksa'e kuda mutik nia, kohi nola buat nia no niakaan mako'an tolek teen nia. Uluk, mako'an nia nalo tadak blaar oi-oik nodi tolek ema, nebee simu niakaan marak no lo'u baa niakaan ai'oik. Mais, oras ne'e, ema maksa'e

✧ 19:15 Kananuk Sia 2:9; Yesaya 63:3; Yoel 3:13; Lia Raiklaran Falu Fila 14:20 ✧ 19:18 Yeskiel 39:17-20

kuda mutik nia, le'ak lerek buat krakat aat nia no niakaan mako'an baa ha'i tasi fatuk lobot mak laka la nakotu.✧

<sup>21</sup> Hotu, ema maksa'e kuda mutik nia, no'o sondadu seluk sia nodi surik mak naklosu sai nosi ibun. Hotu, kawaa sia mai naa mohu maten nia sia hotu-hotu.

## 20

*Sia kesi diabu ulun nodi besi talik to'o tinan rihun ida*

<sup>1</sup> Nunia hotu, ha'u ktitu-karee makbukar lale'an ida tuun mai nosi lale'an. Nia kaer besi talik boot ida, nodi kaer sabi odamatan kuak mak la noo nidin.

<sup>2</sup> Hotu, nia kohi nola samea inan nia mak sia temi na'ak, "Diabu Ulun". Hori uluk, nia mak be'ur nola ema raiklaran. Makbukar lale'an nia kesi nola nia nodi besi talik atu neti natoos iha kuak nia to'o tinan rihun ida.✧

<sup>3</sup> Nia dudu natama samea inan nia baa kuak laran. Hotu, taka mate kuak nia nodi neti natoos samea nia iha nia, to'o tinan rihun ida laran. Hodi nunia, samea nia la bele be'ur ema raiklaran to'o tinan rihun ida. Nunia hotu, foin habusik nia, mais la oras dei.

<sup>4</sup> Hotu, ha'u ktitu-karee kadera ukun wa'in lear no ema mak tuur iha nia. Na'i Maromak foti ema nia sia, nalo baa makotu lia. Uluk, sia ne'e, mak baa keke Yesus Manfatin Di'ak no Maromak Manfatin, to'o ema no'o sia. Sia la lo'u baa buat krakat aat nia no niakaan ai'oik. Sia moos la simu niakaan marak baa siakaan baboton no liman. Sia kona ho'o, mais Na'i Maromak nalo

sia moris nikar, nebee sia kaer ukun namutuk no Kristus to'o tinan rihun ida.☆

<sup>5-6</sup> Hodi nunia, sia dadi baa ema dala uluk mak Na'i Maromak nalo moris nikar nosi mate. Sia sotir tebes, tan sia dadi baa Na'i Maromak eman ti'an. Sia la kona soe baa fatin susar, mak ema noran mate dala rua iha nia. Mais sia dadi hanesan na'ilulik mak naliku Na'i Maromak no Kristus. Sia moos kaer ukun namutuk no Kristus to'o tinan rihun ida.

Mais, ema seluk mak mate ti'an sia, musti nein to'o tinan rihun ida lai, foin Na'i Maromak nalo sia moris nikar.

*Sia soe diabu ulun baa tasi ha'i*

<sup>7</sup> Tinan rihun ida nia siku, Na'i Maromak atu naruka habusik samea inan nia nosi kuak.

<sup>8</sup> Hotu, samea inan nia atu baa be'ur ema klubun sia mak naran Gog no Magog. Sia mai nosi nabee dei iha raiklaran. Sia ema lear, hanesan raihenek iha tasi tehen. Samea inan nia libur sia atu baa natuda.☆

<sup>9</sup> Hodi nunia, sondadu Gog no Magog nariik naktuik atu la'o lema raiklaran lidun sia. Sia mai satan nola Na'i Maromak niakaan kota no niakaan ema sia mak Nia nadomi. Mais, Na'i Maromak atu natuun ha'i nosi lale'an, sunu mohu sondadu nia sia.

<sup>10</sup> Hotu, kohi nola samea inan mak be'ur nola ema lear nia, fi'it soe baa tasi ha'i lobot mak laka la nakotu. Nia atu kona sena iha nebaa namutuk no buat krakat aat nia no niakaan mako'an tolek teen nia. Loron-kalan sia netan susar iha nia to'o nima-nimak.

*Na'i Maromak tetu ema hotu-hotu hahalok*



11 Nunia hotu, ha'u ktitu-karee habesi aan fatin mutin boot ida. Na'i Maromak nabesi aan baa. Sarebak, raiklaran no lale'an nalai karin, to'o lakon mohu la bele haree tenik.

12-13 Hotu, ha'u ktitu-karee ema mak mate ti'an sia, ki'ik-boot hotu-hotu nariik se'i oin baa habesi aan fatin nia. Ema mak mate iha rai maran, iha tasi, no ema seluk nosi matebian fatin nariik se'i oin baa habesi aan fatin nia. Hotu, Na'i Maromak naruka loke hakerek ida atu leno siakaan hahalok hotu-hotu. Hotu, Na'i Maromak nakotu siakaan lia ida-idak, tuir siakaan hahalok iha hakerek nia. Hotu, Na'i Maromak naruka loke tenik hakerek ida seluk, nodi leno ema naran mak atu moris no Nia to'o nima-nimak.\*

14-15 Ema mak naran la noo iha hakerek nia, kona kastikar soe baa tasi ha'i laran. Nunia hotu, la noo mate ona. Matebian fatin moos la noo ona, tan ema hotu-hotu mak naran la noo iha Na'i Maromak hakerek nia, kona soe baa tasi ha'i laran ti'an. Kastikar iha tasi ha'i laran nia, ne'e na'ak, Mate Dala Rua.

## 21

### *Yohanis nobun lale'an no raiklaran foun*

1 Hotu, ha'u ktitu-karee lale'an foun no raiklaran foun, tan lale'an tuan no raiklaran tuan lakon mohu ti'an. Tasi moos la iha ti'an.\*

2 Ha'u moos karee Na'i Maromak Niakaan kota tuun nosi lale'an. Kota nia, kota moon mak sia temi na'ak Yerusalem Foun. Kota nia tetuk no nesan ti'an, hanesan sasudin feto mak nadi'a aan ti'an atu simu sasudin mane.\*

\* 20:12-13 Daniel 7:9-10    \* 21:1 Yesaya 65:17, 66:22; 2 Petrus 3:13    \* 21:2 Yesaya 52:1; Lia Raiklaran Falu Fila 3:12; Yesaya 61:10

<sup>3</sup> Ha'u moos rona kola lia maliak maka'as ida mai nosi habesi aan fatin iha nia na'ak,

“Mana di'a-di'ak!

Nahuu baa oras ne'e, Na'i Maromak hutun-renun bele tama-sai Niakaan Tofatik.

Nahuu baa loron ne'e, Na'i Maromak eman sia moris namutuk no Nia.

Nia dadi baa siakaan Maromak.

Sia moos dadi baa Niakaan hutun-renun.

Nia atu moris no sia nohuun.

Nia atu nein no sia nohuun.✧

<sup>4</sup> Nia atu no'as namara siakaan luun, hotu sia la tanis ona.

Iha kota nia, moras la iha ona.

Iha kota nia, mate moos la iha ona.

Tan hotu-hotu mak nasusar ema hori uluk, la iha ona.

Tan hotu-hotu mak naloot ema hori uluk, lakon mohu ona.”✧

<sup>5</sup> Hotu, Nia mak nabesi aan iha nia dale na'ak, “Mana lai! Ha'u kalo hotu-hotu foun.” Hotu, Nia dale no ha'u tenik na'ak, “Makerek mola lia ne'e ona! Ema bele fiar Ha'ukaan Manfatin ne'e, tan Manfatin ne'e tebes no loos!”

<sup>6</sup> Hotu, Nia katak tenik baa ha'u na'ak, “Hotu-hotu mak Ha'u kamento hori uluk aan, dadi ti'an.

Ha'u ne'e,

Alfa to'o Omega.

Ha'u ne'e,

Ulun to'o Ikun.

Hotu-hotu huun nosi Ha'u,

nosi huun to'o rohan.

Ema hotu-hotu mak nanroo tan nakara moris,

---

✧ **21:3** Yeskiel 37:27; Ukun-badu Na'ilulik 26:11, 12 ✧ **21:4** Yesaya 25:8, 35:10, 65:19

Ha'u karoo sia baa wee matan mak foo moris  
nima-nimak.

Wee nia, Ha'u kfoo loos dei.✧

<sup>7</sup> Ema hotu-hotu mak tuir Na'i Maromak dalam  
nohuun,

sia atu simu nola  
matak-malirin nia.

Tan Ha'u atu kdadi baa siakaan Maromak,  
sia moos atu dadi baa Ha'ukaan oan.✧

<sup>8</sup> Mais, ema seluk sia atu kona soe

baa tasi ha'i fatuk lobot mak laka la nakotu.

Sia mak, ema ta'uk teen,

ema mak se'i kotuk baa Yesus,

ema lisan aat,

ema mahalo lia kfo'er,

ema maho'o ema,

ema mak lo'u-sudur baa ai'oi lulik,

ema mak nakneko ema,

no ema tolek teen.

Sia hotu-hotu atu kona kastikar soe baa tasi ha'i  
nia.

Kastikar nia na'ak 'Mate Dala Rua.'"

### *Yohanis nobun kota Yerusalem foun*

<sup>9</sup> Hotu, ha'u ktitu-karee makbukar na'in ida  
nosi makbukar lale'an na'in hitu mak uluk kaer  
hanek mahisi Na'i Maromak hahibun. Mak-  
bukar nia mai nasoru ha'u nodi dale na'ak, "Mai  
ne'e lai! Ha'u atu katudu baa o sasudin feto mak  
atu nala'e Bibi Malae Oan."

<sup>10</sup> Baa oras nia moos, ha'u kona Maromak  
Kmalar Lulik. Makbukar lale'an nia foti nodi  
ha'u baa foho ida mak aas tebes. Iha nia, nia  
natudu baa ha'u kota Yerusalem mak tuun mai

✧ 21:6 Yesaya 55:1 ✧ 21:7 2 Samuel 7:14; Kananuk Sia 89:26-27

nosi lale'an. Kota nia, Na'i Maromak Niakaan kota lulik.✧

<sup>11</sup> Kota nia, kabaas kaliuk. Noo sinak mak tubu sai nosi Na'i Maromak ahar boot, to'o naroma kota nia tomak. Sinak nia, hanesan fatuk mahoo matan molen.

<sup>12</sup> Noo lutu fatuk aas boot mak satan nola kota nia, no odamatan nanokar sanulu resin rua. Noo makbukar lale'an na'in sanulu resin rua mak daka odamatan nia sia. Iha odamatan ida-idak leten, noo hakerek naran nosi ema Isra'el siakaan uma huun sanulu resin rua.\*

<sup>13</sup> Odamatan nanokar tolu se'i oin baa lorosa'e. Tolu se'i oin baa loromonu. Tolu baa lorokaras, no tolu tenik baa lorokbelan.✧

<sup>14</sup> Lutu fatuk nia nariik baa tatuur fatuk boot sanulu resin rua. Iha fatuk ida-idak noo hakerek naran nosi Bibi Malae Oan klosan na'in sanulu resin rua mak serwisu bodik Nia iha raiklaran.

<sup>15</sup> Nunia hotu, makbukar lale'an mak dale no ha'u, kaer nola kno'a sasukat mean ida, atu sukat kota no odamatan nanokar no lutu fatuk nia.✧

<sup>16</sup> Nia sukat uluk kota nia lutu fatuk lidun haat. Niakaan naruk no belar no aas, hotu-hotu manesak. Ne'e mak, kilo rihun rua atus rua, rua nulu.†

<sup>17</sup> Hotu, nia sukat lutu nia ma'ar, kona ro'a neen nulu resin lima, tuir ema raiklaran sasukat.‡

---

✧ **21:10** Yeskiel 40:2      \* **21:12** Tuir ema matenek lia Hakerek Moon, nomer sanulu resin rua nia, nomer mak hatete baa ema raiklaran tomak. ✧ **21:13** Yeskiel 48:30-35      ✧ **21:15** Yeskiel 40:3  
 † **21:16** Hakerek Moon lia Yunani na'ak '*stadia* rihun sanulu resin rua.'      ‡ **21:17** Hakerek Moon lia Yunani na'ak '*hasta* atus ida haat nulu resin haat.' Tuir ema matenek lia Hakerek Moon, nomer nia hatete baa Na'i Maromak eman hotu-hotu.

18 Lutu nia, halo hosi fatuk mahoo matan. Hotu-hotu mak iha kota nia laran moos, halo hosi mean isin mak molen hanesan lalenok.

19 Tatuur fatuk sanulu resin rua nia moos, halo hosi fatuk mahoo matan oi-oik. Fatuk nia sia folin todan. Fatuk nomer ida, fatuk lakan ilas matak, naran fatuk *yaspis*. Nomer rua, fatuk lakan ilas flahuk, naran fatuk *nilam*. Nomer tolu, fatuk lakan mean, naran fatuk *mirah*. Nomer haat, fatuk lakan ilas matak, naran fatuk *zamrud*.

20 Nomer lima, fatuk mak ilas mean no mutin mak kraan malu, naran fatuk *unam*. Nomer neen, fatuk mak lakan ilas mean, naran fatuk *sardius*. Nomer hitu, fatuk mak lakan ilas modok mean, naran fatuk *ratna cempaka*. Nomer walu, fatuk mak lakan ilas flahuk matak, naran fatuk *beril*. Nomer siwi, fatuk mak lakan modok, naran fatuk *krisolit*. Nomer sanulu, fatuk mak lakan matak nurak, naran fatuk *krisopras*. Nomer sanulu resin ida, fatuk mak lakan flahuk tasi ween, naran fatuk *lazuardi*. Nomer sanulu resin rua, fatuk mak lakan mean asuaten, naran fatuk *kecubung*.

21 Nunia moos, odamatan nanokar sanulu resin rua nia, halo hosi morteen lolon sanulu resin rua. Odamatan ida halo hosi morteen lolon ida. Kota nia dalan sia moos, halo hosi mean isin mak naksinak hanesan lalenok.✧

22 Mais ha'u karee, iha kota nia la noo Uma Hamulak, tan ema lo'u kedan ti'an baa Na'i Maromak mak beran kaliuk no Bibi Malae Oan.

23 Loro no fulan moos la naroma iha nia, tan Na'i Maromak ahar mak naroma kota nia. Bibi Malae Oan ahar moos naroma.✧

<sup>24</sup> Ema nosi klubun hotu-hotu iha raiklaran la'o iha kroman nia laran. Na'i raiklaran sia moos nodi siakaan sasoin kabaas baa kota nia.✧

<sup>25</sup> Iha nia, kalan la iha ona. Tan baa nia, sia la taka kota odamatan nanokar.

<sup>26</sup> Kabaas hotu-hotu no kneter hotu-hotu nosi rai hotu-hotu iha raiklaran noo hotu iha kota nia.✧

<sup>27</sup> Mak la bele tama iha nia, a'aat hotu-hotu. Nu'u ema mak lo'u-sudur baa ai'oi lulik, ema mahalo lia kfo'er, no ema tolek teen. Mak bele tama, ema mak naran noo iha Bibi Male Oan hakerek dei. Tan hakerek nia noo ema naran mak bele moris nima-nimak no Na'i Maromak.✧

## 22

### *Mota no wee mak foo moris*

<sup>1</sup> Nunia hotu, makbukar lale'an nia natudu baa ha'u, mota ida mak ween nalo ema moris nohuun. Wee nia, moon nu'u lalenok. Mota nia suli sai nosi Na'i Maromak no Bibi Malae habesi aan fatin.✧

<sup>2</sup> Hotu, mota nia suli liu baa dalan inan iha kota nia. Iha mota nia balu-baluk, no ai huun mak fuan nalo ema moris nima-nimak. Ai huun nia sia nafua tinan ida, isin sanulu resin rua. Ne'e mak, fulan ida, isin ida. Tahan, bele halo baa aitahan moras, atu hodi hadi'ak ema nosi klubun hotu-hotu iha raiklaran.✧

<sup>3</sup> Mais hotu-hotu mak Na'i Maromak dudu nodi kastikar, la noo iha kota nia. Mak noo iha nia, ne'e mak Na'i Maromak no Bibi Malae Oan mak

---

✧ **21:24** Yesaya 60:3   ✧ **21:26** Yesaya 60:11   ✧ **21:27** Yesaya 52:1; Yeskiel 44:9   ✧ **22:1** Yeskiel 47:1; Sakarias 14:8   ✧ **22:2** Lia Uluk Fohon 2:9

tuur iha habesi aan fatin no siakaan ema mak lo'u-sudur baa Sia.✧

<sup>4</sup> Ema nia sia bele titu-naree besik Na'i Maromak oin. Na'i Maromak naran moos hakerek iha siakaan baboton.

<sup>5</sup> La noo kalan iha kota nia. Na'i Maromak eman sia la buka loro no la buka tenik badut, tan Na'i Maromak ahar du'uk mak naroma kota nia. Sia moos atu kaer ukun iha nia to'o nimanimak.✧

### *Na'i Yesus atu mai ona*

<sup>6</sup> Nunia hotu, makbukar lale'an nia katak baa ha'u na'ak, "Lia hotu-hotu mak ha'u katak baa o ne'e, tebes no loos. Ema bele fiar ha'ukaan dalen ne'e. Uluk, Na'i Maromak nodi Niakaan Kmalar Lulik nebee katak Niakaan Manfatin baa Niakaan mako'an sia. Mais oras ne'e, Nia nodi makbukar lale'an atu katak baa Niakaan ema sia lia ne'e sia hotu-hotu mak la kleur ona musti dadi."

<sup>7</sup> Nunia hotu, Yesus dale na'ak, "Manoin! La kleur Ha'u kmai ona. Hakerek ne'e, nakerek lia hotu-hotu mak atu dadi. Ema hotu-hotu mak nalo tuir lia fuan iha hakerek ne'e, netan sotir."

<sup>8</sup> Ema mak nakerek hakerek ne'e, ne'e mak ha'u, Yohanis. Ha'u ne'e du'uk mak rona no titukaree lia ne'e sia hotu-hotu. Ha'u krona kotu, kakni'a kodi lo'u-sudur se'i oin baa makbukar lale'an mak natudu lia nia sia baa ha'u.

<sup>9</sup> Mais nia de'an ha'u na'ak, "Hoi! Keta malo nunia! Keta lo'u sudur baa ha'u. O musti lo'u-sudur baa Na'i Maromak dei! Tan ha'u moos Na'i Maromak ain-liman hanesan o mo okaan mamaluk sia mak dadi Niakaan mako'an. Ha'u

moos manesak ko ema hotu-hotu mak nalo tuir saa mak hakerek hela iha hakerek ne'e."

<sup>10</sup> Hotu, makbukar nia dale natutan tenik na'ak, "O keta subar hakerek ne'e isin baa ema. Tan la kleur ona, hotu-hotu iha hakerek ne'e, nanis dadi.

<sup>11</sup> Ema mak lisan aat, habusik baa, nebee sia nalo lisan aat bei-beik.

Mais ema mak moris moos, sia musti moris moos bei-beik.

Ema mak nalo aat, habusik baa, nebee sia nalo aat bei-beik.

Mais, ema mak nalo di'ak, sia musti nalo di'ak bei-beik."☆

<sup>12</sup> Nunia hotu, Yesus dale nikar tenik na'ak, "Manoin di'a-di'ak! La kleur tenik, Ha'u kmai ona! Ha'u atu kselu baa ema hotu-hotu, tuir siakaan hahalok du'uk.☆

<sup>13</sup> Ha'u ne'e, Alfa to'o Omega.

Ha'u ne'e, Ulun to'o Ikun.

Hotu-hotu huun baa Ha'u, nosi huun to'o rohan.☆

<sup>14</sup> Ema mak fasi namoos siakaan tais, sia mak sotir.

Tan sia bele tama odamatan nanokar baa kota nia laran.

Ema mak moris moos, sia mak sotir.

Tan sia bele naa ai fuan mak nalo ema moris nima-nimak.☆

<sup>15</sup> Mais ema seluk, la bele tama iha kota nia.

---

☆ **22:11** Daniel 12:10 ☆ **22:12** Yesaya 40:10, 62:11; Kananuk Sia 28:4; Yeremia 17:10 ☆ **22:13** Lia Raiklaran Falu Fila 1:8; Yesaya 44:6, 48:12; Lia Raiklaran Falu Fila 1:17, 2:8 ☆ **22:14** Lia Uluk Fohon 2:9, 3:22



Mak lahoos Na'i Maromak eman, la bele nein iha nia.

Sia ne'e mak, ema mak la fiar baa Na'i Maromak,

ema nalo lia kfo'er, ema mak lo'u baa ai'oi lulik,

ema mak no'o ema, ema mak neko ema, no ema tolek teen.

Sia hotu-hotu nia, la bele tama.

Sia hotu-hotu nia, habusik hela iha luan dei.

<sup>16</sup> Ha'u ne'e, Yesus. Ha'u, mak solok makbukar lale'an nia atu nalore lia ne'e sia hotu-hotu, nebee o baa katak Ha'ukaan Manfatin baa ema sarani klubun hitu nia.

Ha'u ne'e, Na'i Daud husar-binan.

Ha'u ne'e, Na'i makaer ukun.

Ha'ukaan kroman lakan,

boot kaliuk hanesan Fitun Lorosa'e.

Ha'ukaan sinak,

biit kaliuk hanesan Fitun Na'in."✧

<sup>17</sup> Maromak Kmalar Lulik tene na'ak, "Mai ne'e ona!"

Sasudin feto nia moos bolu na'ak, "La'o mai ona!"

Hotu-hotu mak rona moos tuir na'ak, "Mai ona!"

"Ema mak nanroo, mai nemu ona.

Ema mak buka nemu wee mak nalo ema moris nima-nimak,

mai nola ona!

Ema bele nola wee nia

hodi neok.

Ema bele nemu wee nia

hodi la selu."✧

*Yohanis narohan hakerek*

<sup>18</sup> Ha'u, Yohanis ne'e, foo katene baa ema hotu-hotu mak rona lia mak Na'i Maromak nalore kedan iha hakerek ne'e: Kalo noo ema mak tu'an sa-saa baa hakerek ne'e, Na'i Maromak atu kastikar tu'an baa nia, nodi dinu hitu mak Nia fakar baa raiklaran.

<sup>19</sup> Tenik, kalo noo ema mak nasai nalara sa-saa nosi hakerek ne'e, Na'i Maromak atu nola nikar niakaan fafa'ek, nebee nia keta tama baa kota lulik nia, no keta naa ai fuan mak nalo ema moris nima-nimak.✧

<sup>20</sup> Yesus mesan du'uk mak nalore lia ne'e sia hotu-hotu. Nia nameno ti'an na'ak, "La kleur Ha'u kmai ona. Lia ne'e, tebes no loos!"

Kalo nunia, ha'u kakro'an ka'ak, "Mai ona Na'i Yesus!"

<sup>21</sup> Ha'u kaloon nebee, Na'i Yesus natudu laran di'ak baa Niakaan ema hotu-hotu. Amen!

Nosi ha'u,  
*Yohanis*

**Tetun Alkitab**  
**Genesis and the New Testament in the Tetun Belu**  
**language of Indonesia and East Timor**  
**Kejadian dan Perjanjian Baru dalam bahasa Tetun**  
**Belu. Genesis eo Novo Testamento em língua Tétum**  
**Belu.**

copyright © 2013 Unit Bahasa dan Budaya

Language: Tutun Belu (Tetun)

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 18 Apr 2025 from source files dated 31 Aug 2023

66336204-8208-5358-97ab-2b85b8c3392e